

Ya unan hulat ni apostol Pablo kanlan ampaniwala kan Apo Jesu-Cristo ha Corinto

Paunan habi

Bayri ha unan hulat ni apostol Pablo kanlan ampaniwala kan Apo Jesu-Cristo ha balayan Corinto, ay inhulat na ya alwan mangêd ha pamimiyay la, ta labay na ya bayoén la ya habayto. Ya balayan Corinto ay atsi ha lokop hên probinsyan Acaya, ya atsi ha lokop hên bansan Italia, hên habayton panaon ni apostol Pablo. Hilay tawo bayro ay ampaghabi hên habin Griego. Ya balayan Corinto ay andayêwên gawan ha kahipêgan haka ha kamwangan lan ampaidi bayro, noa, hadya êt ya karawakan la, haka hino-hinoy paniwala la bayro.

Hadyay potog ni apostol Pablo hên namwangan na ya ayn hilay nan pamikakasundo ya hilay ampaniwala kan Apo Jesu-Cristo bayro, haka gawan karawakan kalabayan lawini ya andaygên lan kaatag. Pinakibatan nay kotang la hên tungkol ha pamiahawa, no hino ya dapat lan daygên lan babayi ya bawo haka ya kaatag ya ayn ahawa, haka ya tungkol ha pamangan ya imparaêp ha ansimbaên lan kaatag, ya rebulto, ya alwan pêtêg ya diyos. Nanulat ya êt hên tungkol ha kagaligan, pamangintindi boy kaatag ya an-idigalo nan Espiritu ni Apo Namalyari, haka hên tungkol ha

pangabiyay oman ni Panginoon Jesu-Cristo boy hilay ampaniwala kana.

Labay na ya magkamain hilan kangêran ha pamimiyay la, kabay hinulatan na hila.

Kabooan hên pinakalaman

Umpisan hulat 1:1-9

Ayn pamikakasundo ha pami-tsi-tsipon lan ampaniwala 1:10-4:21

Dapat paral-an hilay patêl ha Panginoon, ya ampanyag karawakan 5:1-13

Ya pamiarap hên kaparehon ampaniwala kan Apo Jesu-Cristo hên gêtan ha manungkulan 6:1-11

Ya pamimiyay ya an-ikahigla ni Apo Namalyari 6:12-20

Ya kotang tungkol ha pamag-ahawa 7:1-40

Ya ampanyag hên karawakan kalabayan lawini haka ya pamag-ahawa 5:1-7:40

Hilay ampaniwala haka a ampaniwala kan Apo Jesu-Cristo 8:1-11:1

Biyay lan ampaniwala kan Apo Namalyari haka ya pamagsimba la 11:2-14:40

Ya pangabiyay oman ni Panginoon Jesu-Cristo haka hilay ampaniwala kana 15:1-58

Ya idigalo kanlan ampaniwala ya taga-Judea 16:1-4

Ya pamaglêan ni apostol Pablo haka ya tawlin habi 16:5-24

¹ Hiko hi Pablo, ya pinili ni Apo Jesu-Cristo hên mag-in apostol na, gawan ha kalabayan ni Apo Namalyari. Hi Sostenes, ya patêl tamo ha Panginoon, ay kalamo kon ampangumusta kamoyu.

² Anhulatan kataw bahêñ ha Corinto, ya pinili ni Apo Namalyari hêñ mag-in kana. Ha pakikim-ihä yo kan Apo Jesu-Cristo, ay hikaw ya inorong na hêñ impapawa êmén manyag kangêran, hêñ kalamo lan patêl ha Panginoon ya angkapi-tsitsipon, ya kapareho tamon ampanalangin kan Panginoon tamon Jesu-Cristo, ha ayri man ya logal.

³ An-ihalangin naêñ kaw ya dyanan kaw dayi hêñ kapatékbêkan, haka ingalwan kaw dayi ni Apo Namalyari ya Tatang tamo, haka ni Panginoon Jesu-Cristo.

Ya ayn kapantag ya ingalo ya ubat kan Apo Jesu-Cristo

⁴ Panay kataw an-ipagpahalamat kan Apo Namalyari, ya ansimbaêñ ko, gawan ha ayn kapan-tag ya ingalo na kamoyu, ya tinanggap yoy na ha pamakimiha yo kan Apo Jesu-Cristo.

⁵ An-ipagpahalamat kataw, ta gawan ha pamakimiha yo kana, ay dinyanan na kaw hêñ hino-hino kay na hêñ ya kagalingan, ta êmén yo maintindihan haka maipamwang ya tungkol kana.

⁶ Ya intoro naêñ kamoyu, ya tungkol kan Panginoon Jesu-Cristo, ay kaptégan ya angkahêlêk ha pamimiyay yo.

⁷ Kabay a kaw ampagkulang ha hinoman ya an-idin nan Espiritu ni Apo Namalyari, kaban an-êngganan yon mag-orong ya Panginoon tamon Jesu-Cristo.

⁸ Pataniêhêñ nay nakêm yo, kaban atsi kitamo pon bayri ha luta, êmêñ na kaw malatêng hêñ ayn kapintasan ha allon pamag-orong na.

⁹ Mapaypaniwal-an hi Apo Namalyari, ya namili kamoyu, ta êmêñ kaw magkamain hêñ pamakilamo ha Anak na, ya hi Panginoon tamon Jesu-Cristo.

Ya toro kanlan main paniwala kan Apo Jesu-Cristo ya angkapi-papawá ha balayan Corinto

¹⁰ Hikaw ya patêl ko ha pakikimiha kan Panginoon tamon Jesu-Cristo, ampakihabi ko kamoyu, ya magmimiha kaw hêñ nakêm, ihip haka pamphabi, ta êmêñ maalíh ya pami-gagampi yo.

¹¹ Hikaw ya patêl ko, an-iaral koy habayto kamoyu, ta main ubat ha bali ni Cloe, ya nampamwang kangko ya angkapi-huhubak kaw.

¹² Êmêñ ya di ya labay kon habiêñ, ya tungkol kamoyu: wanana miha, “Anhonolêñ koy an-itoro ni Pablo.” Wanay na êt hêñ miha, “Kan Apolos ako.” Main kaatag kamoyu ya ampaghabin, “Anhonolêñ koy an-itoro ni apostol Pedro.” Haka main êt hêñ ampaghabin, “Anhonolêñ koy an-itoro ni Apo Jesu-Cristo.”

¹³ Yarin mapiaatagan hi Apo Jesu-Cristo! Yarin hiko, hi Pablo, ya natsi ha koros ha ikakangêd yo! Yarin binawtismoan kaw ha langan ko!

¹⁴ Ampahalamatan ko hi Apo Namalyari ta hi Crispo haka hi Gayon bêngat ya binawtismoan ko bahêñ kamoyu,

¹⁵ ta êmêñ ayn makapaghabin binawtismoan kaw ha tungkulon ko.

16 (Main êt awud ya binawtismoan ko, ya hi Estefanas haka ya pamilya na. Ayn kinan muwang ya kaatag ya binawtismoan ko.)

17 Ta a na ko in-utoh ni Apo Jesu-Cristo hên mamawtismo, noa, in-utoh na ko hên idiretsa kon ipamwang ya Mangêd ya Habi, ya tungkol kana ta êmén a maalihan alagá ya pangamatsi ni Apo Jesu-Cristo ha koros.

Hi Apo Jesu-Cristo, ya kapangyarihan haka ya kamwangan ni Apo Namalyari

18 Ya toro tungkol ha pangamatsi ni Apo Jesu-Cristo ha koros ay kamulalaan kanlan mipalako ha impiyerno. Noa, kantamon an-iligtas na, ay habayto ay kapangyarihan ni Apo Namalyari êmén miligtas kitamo ha impiyerno.

19 Ta nakahulat ha Kahulatan* ni Apo Namalyari, ya wana, “Alihêñ koy kamwangan lan manga-talino, ta ipamwang ko ya ayn kapukatan ya habayto.”

20 No êmbayro, ay ay-êmén hilay main kamwangan? Ay-êmén hilay mánoron Kautuhan ni apo Moises? Ay-êmén hilay magaling hên magdebate amêhêñ. Intad nay na ni Apo Namalyari hên kamulalaan, ya kamwangan lan a ampagpalokop kana.

21 Ta gawan ha kamwangan ni Apo Namalyari, ay a na pinaulayan ya hiya ay makilala, gawan ha talino lan a ampagpalokop kana. Ya labay na ay miligtas kitamo ya ampaniwala, gawan ha pangipamwang hên tungkol kan Apo Jesu-Cristo, agyan habiêñ lan main kamwangan ya ubat di ha

* **1:19** Isaias 29:14.

luta, ya kamulalaan, ya toro ya tungkol kan Apo Jesu-Cristo.

²² Hilay kapareho kon Israelita, ay ampanapol hēn kapapaêpapah, bayo hila maniwala ya pêtêg ya angkagilaman la hēn tungkol ha tinalagá ni Apo Namalyari. Haka hilay alwan Israelita, ay ampanapol hēn kamwangan.

²³ Êmbayro man, ay an-ipamwang naên ya tungkol kan Apo Jesu-Cristo ya natsi ha koros. Habayto ay kapahuluk ha kapareho kon Israelita. Haka habayto ay an-itad lan kamulalaan, lan alwan Israelita.

²⁴ Noa, kantamon pinili ni Apo Namalyari, hēn nag-in kana, Israelita man, o alwa, hi Cristoy kapangyarihan haka kagalingan ni Apo Namalyari.

²⁵ Ta ya kamatsan ni Apo Jesu-Cristo ha koros, ya êndat lan kaatag, ay kamulalaan ni Apo Namalyari, ay magaling pon ha kamwangan hēn hinon tawo. Êndat lan kaatag ya kamatsan ni Apo Jesu-Cristo, ay palatandaan hēn ayn kapangyarihan hi Apo Namalyari, noa, ya kapangyarihan ya gina-mit na, ay makapangyarihan pon ha kapangyarihan hēn hinon tawo.

²⁶ Hikaw ya patêl ko ha Panginoon, pakaihipêñ tamo no ay-êmêñ ya pangatawo tamo hēn bayo na kitamo pinili ni Apo Namalyari hēn humonol kan Apo Jesu-Cristo. Main ungnon bêngat kantamo ya main galing ha hêlêk lan tawo di ha luta. Main ungnon bêngat kantamo ya main tungkulon. Haka ungnon bêngat kantamo ya mabandi.

²⁷ Ta pinili na kitamo, ya ayn minúwang ha hêlêk lan a ampagpalokop kan Apo Namalyari, ta êmêñ mipakarêng-êy hilay ampaghabi ya hila ay main

kamwangan. Pinili na kitamoy makapéy ha hêlêk lan ayn paniwala kan Apo Jesu-Cristo, ta êmén mipakarêng-êy hilay ampaghabin makhaw hila.

²⁸ Pinili na kitamoy manga-aypa ha hêlêk lan tawo, hên daygên ayn pukat ya hilay manga-tagay ya tungkulon ha hêlêk lan a ampagpalokop kan Apo Namalyari.

²⁹ Dinyag nay habayto, ta êmén ayn hinoman ya makapaglambung ha arapan na.

³⁰ Ya pakikimiha tamo kan Apo Jesu-Cristo, ay nangubat kan Apo Namalyari. Hi Apo Jesu-Cristo ya nag-in kamwangan tamо. Gawan kana ay inakbusan kitamo ha pangaipoh tamо ha kasalanan. Gawan êt kana ay hikitamoy an-intad ni Apo Namalyari hên ayn kasalanan, haka a kitaminan manalagá hên manyag kasalanan.

³¹ Kabay nanad ha nakahulat ha Kahulatan ni Apo Namalyari, “Ya dyag ni Apo Namalyari ya dapat tamon ipagmahlay no main kitamon labay hên ipagmahlay.”[†]

2

An-ipamwang ni apostol Pablo hi Apo Jesu-Cristo, ya impako ha koros

¹ Hikaw ya patêl ko ha Panginoon, hên nanoro ko bahêن kamoyu hên nangipamwang hên impamwang ni Apo Namalyari kangko, ya tungkol kan Apo Jesu-Cristo, ya a na pon impamwang ha kaatag, ay alwan mangalalê ya pamaghabi ko, haka a ko nanggamit hên kagalingan lan ayn paniwala kan Apo Jesu-Cristo.

[†] **1:31** Jeremias 9:24.

² Ta tinalagá ko ya ayn akon kaatag ya ipamwang kamoyu, no alwan bat hi Apo Jesu-Cristo, haka lalon-laloy na, ya pangamatsi na ha koros.

³ Hêñ haton atsi ko bahêñ, ay alwan makhaw ya nakêm ko haka namêgpêg ako ha hadyay limo ko, ta atsi ha ihip ko ya kayno a ko madyag ya an-ipadyag ni Apo Namalyari kangko.

⁴ Ha pamaghabi ko haka ha pangipamwang ko, ay a kataw hêñ inamuyot hêñ mangangêd ya habi hêñ tungkol bêngat ha kamwangan hêñ tawo. Noa, ya pamaghabi ko, haka ya pangipamwang ko, ay kalamo hêñ kapapaêpapah ya ubat ha kapangyarihan nan Espiritu ni Apo Namalyari.

⁵ Kabay ya paniwala yo ay gawan ha kapangyarihan ni Apo Namalyari, alwan gawan ha kamwangan hêñ tawo bayri ha luta.

Ya kamwangan ni Apo Namalyari

⁶ Main kamwangan ya an-ipamwang naêñ kanlan nakataniêh ya nakêm ha paniwala la kan Apo Jesu-Cristo. Habaytoy kamwangan ay alwan kamwangan di ha luta haka alwan kapangyarihan lan ampamaala, ya main anggaan.

⁷ Noa, ya kamwangan ya an-ipamwang naêñ ay babayon impamwang ni Apo Namalyari. Binalak na hêñ haton lagi, ya hikitamoy makapakilamo ha panga-Diyos na ha langit.

⁸ Habaytoy pamipamwang ay a lan naintindihan lan ampamaala di ha luta, ta no naintindihan la dayi, ay a la ya impapako ha koros hi Apo Jesu-Cristo, ya ayn kapantag, ya Panginoon hêñ langit.

9 Noa, ya dinyag ni Apo Namalyari ay nanad ha nakahulat ha Kahulatan na, ya wana:

“Ayn pon nakahélêk o nakagilam, haka ayn pon nakaihip, hén in-il-an ni Apo Namalyari kanlan ampanlugud kana.”*

10 Noa, habaytoy impamwang kantamo hén Espiritu ni Apo Namalyari. Hiya ya main kamwangan ha kaganawan kamwangan. Muwang na êt ya mangalalé ya atsi ha ihip ni Apo Namalyari.

11 Ayn hén ampakamwang hén laman nakém tamo no alwan hikitamon bat. Êmbayro êt hi Apo Namalyari. Ayn makamwang hén laman nakém na, no alwan bat ya Espiritu na.

12 Hata Espiritu na, ay tinanggap taminan ampaniwala kan Apo Jesu-Cristo, ta êmén tamon maintindihan ya kaganawan ya indigalo na kantamo. A tamo tinanggap ya kaihipan ya ubat kanlan a ampagpalokop kan Apo Namalyari.

13 Kabay an-ipamwang naên, ya ubat ha Espiritu ni Apo Namalyari, kamoyun hinapatan nay na. Ya an-ipamwang naên ay alwan ubat ha kamwangan hén tawo.

14 Habaytoy an-ipamwang naên ay a maintindihan lan a pon hinapatan hén Espiritu na, ta êndat la no kamulalaan ya habayto, gawan a la angkaintindihan ya angkaintindihan tamо ya hinapatan ana.

15 Hikitamoy an-akayén nan Espiritu ni Apo Namalyari, ay ampanimbángan, no mangéd o alwan mangéd ya kaganawan. Noa, hilay a pon hinapatan hén Espiritu ni Apo Namalyari, ay a

* **2:9** Isaias 64:4.

ampakaintindi hēn pangatawo tamon an-akayēn nan Espiritu na.

¹⁶ Ta êmēn di ya nakahulat ha Kahulatan ni Apo Namalyari:

“Ayn hinoman ya makamwang hēn kaihipan ni Apo Namalyari.

Haka ayn hinoman ya malyarin mam-in payo kana.”[†]

Noa, hikitamoy hinapatan nan Espiritu ni Apo Namalyari, ay atsi kantamo ya kaihipan, ya nanad kaihipan ni Apo Jesu-Cristo.

3

Hilay ampaghuyu kan Apo Namalyari

¹ Patêl ko ha Panginoon, hēn atsi ko bahēn kamoyu, ay a kataw tinoroan hēn mangalalê ya toro ya nanad ha an-itoro ko kanlan hinapatan Espiritu ni Apo Namalyari. Noa, tinoroan kataw hēn nanad kanlan ampanyag hēn kalabayan lan lawini, ta nanad kaw ha nanaway anak, ya a pon nakataniêh ya nakêm ha paniwala kan Apo Jesu-Cristo.

² Kabay ya pamanoro ko kamoyu, ay nanad kataw hēn pinainêm hēn gatas, ta nanad kaw hēn a pon makaêkan hēn mantêg ya pamangan. A kataw tinoroan hēn mangalalê ya tungkol kan Apo Namalyari, ta angga amêhêن, ay a yo pon angkaintindihan ya habayto.

³ A yo pon angkaintindihan ya mangalalê ya tungkol kan Apo Namalyari, gawan andaygêن yo pon ya kalabayan hēn lawini yo. Ta ampag-inakit

[†] 2:16 Isaias 40:30.

kaw, haka ampakihubak kaw. Habayto ay am-pamaptêg hên dyag yo, ay nanad pon kanlan ayn paniwala kan Apo Jesu-Cristo.

⁴ Ta wanana miha, “Anhonolên koy an-itoro ni apostol Pablo.” Haka wanay na êt hên miha, “Anhonolên koy toro ni Apolos.” Ha habi yon habayto ay nanad kaw pon kanlan ayn paniwala kan Apo Jesu-Cristo.

⁵ Awta? Hino hi Apolos? Haka hino ko? Hikay ya tagahuyon bat ni Apo Namalyari ya anggamitên na, ta êmên kaw maniwala kan Apo Jesu-Cristo. Tsi-tsi-ihä kay ampanyag hên an-ipadyag na kannaén ni Apo Namalyari.

⁶ Hikoy nanad mihay namitanêm hên bini. Hi Apolos ay nanad hên mihay nanugtug lanêm ha intanêm. Noa, hi Apo Namalyari ya namatubo.

⁷ Di ha paytoron habi na, ay alwan hiko, ya nanad ampangitanêm, ya dapat dayêwên. Haka alwan hilay ampaytugtug lanêm ha intanêm, ya dapat dayêwên. Noa, hi Apo Namalyari ya ampatubo, ya dapat puriên.

⁸ Hiko ya nanad ampangitanêm, haka hila ya nanad ampaytugtug ha intanêm, ay parehon bêngat ha hêlêk ni Apo Namalyari. Hiyay ampam-i kannaén hên tsi-tsi-ihan úpa naén bayro ha pinagpagalan naén.

⁹ Hikay ay parehon tagahuyo ni Apo Namalyari, haka hikaw ay nanad ha pananêman na ya anobraén naén.

Nanad kaw êt hên bali ya an-ipairêng ni Apo Namalyari.

¹⁰ Ha ayn kapantag ya ingalo ya indigalo ni Apo Namalyari kangko, ay nanad akon mihay maga-

ling ya manyag bali ya namipairêng hên napah-êy ya tarêk, ta hikoy nunan nanoro kamoyu hên tungkol kan Apo Jesu-Cristo. Kaatag etaman ay nanad ampamihundo hên pamanyag bali, ta an-ihundo lay paytoro la kamoyu hên tungkol kana. Noa, kailangan kaillag, ya balang ampamihundo ha pamanyag bali, no ay-êmên ya pamanyag la.

¹¹ Ta mimiha na ni Apo Jesu-Cristo, ya nanad napah-êy ya tarêk hên habain ya bali. Dapat ayn ihagili kana, ta hiyan bat ya makapiligtas kantamo.

¹² Hino-hino kay na hên ya anggamtîn lan ampamihundo hên manyag bali. Main ampanggamit hên a maulam hên nanad ha ginto, pilak haka mangakamal ya bato. Hilay kaatag ay ampanggamit hên maulam hên nanad ha kayo, yabot, o aray.

¹³ Ha Allon Pamanukom ni Apo Jesu-Cristo, ay subukên ya dyag hên balang miha ha apoy, ta êmên mamwangan no ay-êmên kakangêd ya.

¹⁴ No a maulam ya impairêng bayro ha napah-êy ya tarêk, ay makatanggap hilan úpa, hilay habaytoy in-alimbawa kanlan namipairêng hên habayto.

¹⁵ No maulam ya impairêng la, ay a hila makatanggap hên úpa. Maligtas tanay biyay la hên nanad kanlan inligtas ha bali ya angkaulam.

¹⁶ Nanad a yo muwang ya hikaw ay bali ni Apo Namalyari, ya ampaidyanan nan Espiritu na!

¹⁷ Ya bali ni Apo Namalyari ay impapawan bat para kana, haka hikaw ay habaytoy bali na. Hilay manyag hên manira kamoyu ay hiraêna.

¹⁸ Alwa yon lokoêñ ya sarili yo. No êndat

yon matalino kaw ha hêlêk lan tawo di ha luta, ya mangêd ay talibatokan yoy habayto, ta êmên kaw magkamain mantêg kamwangan ha hêlêk ni Apo Namalyari, agyan itad la kaw bayton ayn minuwang.

19 Ta ya kamwangan lan a ampagpalokop kana, ay kamulalaan ha hêlêk na. Êmên ya di ya nakahulat ha Kahulatan* na: “Andakpêni Apo Namalyari hilay êndat lan manga-talino hila, ta ipahlêk na kanla ya ayn pukat, ya êndat lan kamwangan.”

20 Wana† êt ha Kahulatan na: “Muwang hêñ Panginoon ya ayn pukat ya an-ihipêñ lan main kamwangan ha hêlêk lan tawo di ha luta.”

21 Kabay paan yon ipaglamburg ya pamanhumonol yo ha miha man kannaêñ, ta naubuh kay hêñ in-utoh kamoyu. Ya balang hino ay kamoyu,

22 mag-in hiko, o hi Apolos, o hi Pedro, o kaatag ya atsi bayri ha luta. Ya biyay yo, ya kamatsan yo, ya allo amêhêñ, haka ya alloy lumatêng, ay panay ubat kan Apo Namalyari ha ikakangêd yo,

23 gawan ha pakikimiha yo kan Apo Jesu-Cristo, ya main pakikimiha kan Apo Namalyari.

4

Hilay apostol ni Apo Jesu-Cristo

1 Hikay ya apostol ni Apo Jesu-Cristo, ay dapat mamwangan ha paghuyo naêñ kana. Impatsiwala ni Apo Namalyari kannaêñ ya toro na, ya a na impamwang hêñ haton lagi.

2 Hilay dinyanan tungkulon, ay dapat mag-in mapaypaniwal-an.

* **3:19** Job 5:13. † **3:20** Awit 24:11.

³ Ayn pukat ya laman ihip yo, haka ya laman ihip hên kaatag ha pamangotang kangko hên tungkol ha paniwala ko. Hiko man, ay a ko angkotangên ya sarili ko.

⁴ Malinis ya nakêm ko. Noa, a ko anhabîen ya ayn akon kasalanan. Mimiha na ni Panginoon ya manatol kangko.

⁵ Kabay paan kaw mangatol. Êngganan yoy pamatanol hên Panginoon. Iubuh nan ipamwang ya a pon nailtaw, haka ya kaihipan hên balang miha. Bayo dayêwên ni Apo Namalyari ya dapat nan dayêwên.

⁶ Hikaw ya patêl ko ha Panginoon, ha ikakangêd yo ay in-alimbawa ko hi Apolos haka ya sarili ko, ta êmên yo maintindihan ya aral ya nakahulat. Ta no honolên yoy habayto, ay mag-in pantag ya hêlêk yo kannaên hên pare-parehon tagahuyo ni Apo Namalyari.

⁷ Alwa kaw mangêd ha kapareho yo. Ya kaganawan atsi kamoyu, ay ubat kan Apo Namalyari, kabay paan yon ipaglambung ya indigalo kamoyu, ya waringan pinapgagalán yo.

⁸ Kayno êndat yon atsi kamoyu ya kaganawan ya an-idigalo nan Espiritu ni Apo Namalyari. Kayno êndat yon mangêd kaw kannaên, haka ampamaala kaw na. Mangêd dayi no êmên bayro, ta êmên yo kay makalamo ha pamamaala yo.

⁹ Ha ihip ko, ay nam-i hi Apo Namalyari kannaên, ya apostol na, hên pinakamaaypa ya tungkulán ha hêlêk lan tawo. An-itwad la kay hên nanad kanlan ampatsêñ, ya an-ibita pon hên ipahlêk ha balang miha, kanlan tawo haka anghel.

10 Gawan ha pamaghuyo naêñ kan Apo Jesu-Cristo, ay an-itad la kay hên mangakapêy ya ayn minuwang. Noa, anhabiên yo ya hikaw ay mangatalino, gawan ha pakikimiha yo kan Apo Jesu-Cristo. Hikay etaman, ay alwa kay hên makhaw kano. Noa, hikaw ay mangakhaw kano. A la kay anggalangêñ, noa, anggalangêñ la kaw.

11 Paubat hên hato angga amêhêñ hikay ya kit, ay angkablay lonoh haka angkaangan. Ya takop naêñ ay nikagugulot. Ampatokêñ la kay. Ayn kay hên sarilin legal ya paidyanan.

12 Hikay ay ampagpagal ha an-ikabiyay naêñ. Musmusêñ la kay man ay an-ihalangin naêñ hila. No ampairapan la kay ay ampagtêéhan naêñ ya pamairap la kannaêñ.

13 No anhiraêñ la kay, ay ampakibatan naêñ hila hên naamêy ya pamaghabi. Paubat hên hato angga amêhêñ ay an-itad la kay hên basura, ya intapon.

14 Hiko ya ampanulat hên habaytsi kamoyu, alwan ha an-ipakarêng-êy kataw, noa, antoroan kataw ta hikaw ay nanad kinan anak ya anlugurêñ ko.

15 Main man hên mapon libo ya manoro kamoyu hên tungkol kan Panginoon Jesu-Cristo, ay hiko pon êt ya pinagka-toa yo ha paniwala kan Panginoon Jesu-Cristo, ta hiko ya nangitoro kamoyu hên Mangêd ya Habi tungkol kana.

16 Kabay ampakihabi ko kamoyu, ya daygêñ yo kon alimbawa.

17 Kabay ampalakwêñ ko bahêñ hi Timoteo, ya anlugurêñ haka tapat kon anak ha paniwala, ta êmêñ na ipaihip kamoyu, ya an-itoro ko. Ha ka-

ganawan logal, ay habaytsi ya an-itoro ko kanlan patêl ha Panginoon ya angkapi-tsi-tsipon.

¹⁸ Main ungno kamoyu bahên, ya ampaglambung, ya êndat la no a ko makalako bahên.

¹⁹ No kalabayan hêن Panginoon, ay tampol kataw hirawêن. Mamwangan kina bayto, no main hilan kapangyarihan hilay ampaglambung, o no angga hilan bat ha bêbêy.

²⁰ Ta no nagpalokop kitamina kan Apo Namalyari, ay mahêlêk ya kapangyarihan na ha biyay tamo hêن alwan bat ha habi.

²¹ Hinoy labay yo? Ha paniraw ko kamoyu, ay mantan akon pangumpah kamoyu, o matoroaan kataw hêن main pamanlugud haka kaaypaan nakêm?

5

Dapat paral-an hilay patêl ha Panginoon, ya ampanyag karawakan

¹ Angkababalit-an ko ya main kamoyun ampaniwala kan Apo Jesu-Cristo, ya miha ya ampanyag hadyay karawakan kalabayan lawini, ta antakhêن nay ikalwan ahawa hêن tatang na. Hila man ya a ampagpalokop kan Apo Namalyari, ay a ampanyag hêن êmbayro ya karawakan.

² Alwan bat habayto ta ampaglambung kaw êt, ya dapat yon ikalungkot, haka ya ampanyag hêن êmbayro ya karawakan, ay dapat yon paalihêن ha pami-tsi-tsipon yon ampaniwala kan Apo Jesu-Cristo.

³ Agyan ayn ako bahên, ay atsi kamoyu ya nakêm ko, kabay anhabiên ko ya dapat yon paral-an ya ampanyag hêن êmbayro.

4 Kabay ihipêñ yoy aral ko kamoyu, no magtsipon kaw hên pihabian ya dapat yon daygên. Ha tungkulon haka kapangyarihan ni Panginoon Jesus, ay

5 paulayan yoy nan pairapan ni Satanas ya lawini hên ampanyag hên habayto, ta êmén na talibatokan ya karawakan dyag na, haka êmén miligtas ya kaêlwa na ha allon pamag-orong ni Panginoon Jesu-Cristo.

6 Alwan mangêñ ya kalangkaan yo. Muwang yoy na ya hata kahabian, ya wana, “Ya pêrad ya pampaalsa ay makapakahlay hên kal-atan arina.” Kayno totoën lan kaatag ya habaytoy narawak ya dyag, ya nanad ha pampaalsa bayro ha kahabian.

7 Dapat yon alihêñ ya nangarawak, ya nanad pampaalsa, ta dinyag na kaw ni Apo Jesu-Cristo hên ayn kasalanan ha arapan ni Apo Namalyari. Dapat yon alihêñ ya habaytoy nangarawak, ta êmén ya pamimiyay yo, ay mag-in nanad bayon puto, ya ayn pampaalsa, ya an-ilamo ha biseron tupa ya in-átang, ya pampaskwa. Gawan natsi yay nay namiligtas kantamo, ya ayn kaatag no alwan hi Apo Jesu-Cristo, ya maialimbawa bayro ha biseron tupa.*

8 Kabay magpakahigla† kitamoy ampaniwala kan Apo Jesu-Cristo, hên mamiyay hên ayn kasalanan, haka karawakan, ta dapat panay kangêran haka kaptêgan ya pamimiyay tamo.

9 Hinulatan kataw hên hato, ya paan kaw makilamo kanlan mapanyag karawakan kalabayan

* **5:7** Exodus 12:5. † **5:8** (nanad kitamon makipista ha Pistang Pangalitgas ha Egipto) Exodus 13:7, Deuteronomio 16:3.

lawini.

¹⁰ Ya labay kon habiēn, ay hilay mapanyag karawakan, ya ampaniwalay na kan Apo Jesu-Cristo, ya dapat yon dayuán. Kaban atsi kaw di ha luta, ay panay yon matupa hilay mapanyag karawakan, ya a pon ampaniwala kan Apo Jesu-Cristo, ya hilay mapanyag karawakan kalabayan lawini, kapanalarêhan, kapanakawan, haka hilay ampagsimba ha alwan pêtêg ya diyos. Taganán a yo hila madayuán kaban atsi kaw pon di ha luta.

¹¹ Ya labay kon habiēn, ay paan kaw makilamo kanlan ampaghabin patêl hila ha Panginoon, noa, mapanyag hilan karawakan kalabayan lawini, karidyaan, kapamusmusan, kapaniraan, kapaglahingan, kapanakawan, o magsimba ha alwan pêtêg ya diyos. Paan kaw makiaêm man kanla.

¹² Ayn kitamon tungkulon hên hatolan hên parusaan hilay a pon ampaniwala kan Apo Jesu-Cristo. Ya dapat tamon lingonêh hên parusaan, ay hilay ampaniwalay na, ya mapanyag karawakan, ya ampakilamo ha pamitsi-tsipon tamon patêl ha Panginoon.

¹³ Lingonêh ni Apo Namalyari hên parusaan hilay a pon ampaniwala kan Apo Jesu-Cristo. Ya dapat yon daygêh, ay paalihêh yoy habaytoy ampanyag hadyay karawakan kalabayan lawini ha pamitsi-tsipon yon patêl ha Panginoon.

6

Ya pamiarap hên kaparehon ampaniwala kan Apo Jesu-Cristo hên gêtan ha manungkulan

¹ No main kamoyu ya main reklamo laban ha kapareho yon ampaniwala kan Apo Jesu-Cristo, ay dapat marêng-êy hilan mangiarap kanlan mánlingon kaso, ya ayn pon paniwala kan Apo Jesu-Cristo. Dapat palingon hila ha kapareho lan ampaniwala.

² Yarin a yo muwang ya lano, ay hikitamoy main paniwala kan Apo Jesu-Cristo, ya manatol hên parusaan hilay a ampagpalokop kan Apo Namalyari! No hatolan tamo hilay ayn paniwala kan Apo Jesu-Cristo lano, ay malingon tamo pon kaya ya alwan nabyat ya kaso hên kapareho tamon main paniwala!

³ Lano, hatolan tamo hilay anghel ha langit. No mahatol tamoy anghel, ay malingon tamo pon kaya ya angkalyari hên allo-allo di ha luta amêhê?

⁴ No main kaw hên kaso ya êmên di, awta aniarap yo hila kanlan ayn paniwala kan Apo Jesu-Cristo?

⁵ Kaparêng-êy hên iarap ya kaparehon ampaniwala kan Apo Jesu-Cristo, ha mánlingon kaso, ya ayn paniwala kan Apo Jesu-Cristo. Siguradon main kapareho yo ya kamwang hên mamitoyo hên a angkapikakasundo.

⁶ Yan an-iarap yoy kapareho yon ampaniwala kan Apo Jesu-Cristo ha mánlingon kaso ya a ampaniwala kan Apo Jesu-Cristo.

⁷ Ya pamididikil yo hên miha ta miha ay pamaptêg hên main kaw hên pamagkulang kan Apo Namalyari. Ya mangêd, ay têêhêن yo tana ya kasalanan la kamoyu. Haka paulayan yo hila tana dayi hên mangwan bandi yo.

⁸ Yan, hikaw pon êt ya ampaniwala kan Apo Jesu-Cristo, ay ampipapahakitan hên nakêm ha miha ta miha, haka ampangwan bandi hên kpareho yo man ampaniwala.

⁹ Nanad a yo pon muwang, ya hilay mapanyag karawakan, ay a makapakilamo ha lokop ni Apo Namalyari. Paan yon lokoën ya sarili yo. A makapakilamo ha lokop ni Apo Namalyari, hilay mapanyag karawakan kalabayan lawini, hilay ampagsimba ha alwan pêtêg ya diyos, hilay mamabayi, hilay makilalaki, hilay mâmigagalaw ya parehon lalaki o parehon babayi,

¹⁰ hilay mapanakaw, hilay mangatalarêh, hilay mapaglahing, hilay mapammusmus, haka hilay mapanloko. Ayn kanla ya makapakilamo ha lokop ni Apo Namalyari.

¹¹ Main ungno kamoyu ya nanyag hên êmbayro hên hato. Noa, gawan ha kapangyarihan ni Pangnoon Jesu-Cristo haka ya Espiritu ni Apo Namalyari, ay hikaw ay nilinisan, hikaw ay pinili ni Apo Namalyari hên mag-in kana, haka hikaw ay anitad na hên ayn kasalanan.

Ya pamimiay ya an-ikahigla ni Apo Namalyari

¹² Main kamoyu, ya ampaghabin madyag tamina ya hinon a imbawal ni Apo Namalyari. Êmbayro man, ay mal-at ya dyag, ya alwan ha ikakangêd tamo. Haka a ko dapat manyag hên a ko maitêgên, no labay nan itêgên kina ya habayto. Ta no panay kon andaygên ya habayto, ay nanad hikoy nag-in ipoh hên andaygên ko.

¹³ Pêtêg ya anhabiên yo ya pamangan ay para ha bitoka, haka ya bitoka ay pangipalamnan hên

pamangan. Lumatêng ya allo ay parehon hiraên ni Apo Namalyari. Kabay alwan maalagá ya paman-gan. Ya maalagá ay lawini tamo, ta habayto ay alwan para manyag karawakan kalabayan, noa, habayto ay pan-ihuyo ha Panginoon, haka hiya ya mam-in kaganawan kailangan hên habayto.

14 Ya lawini tamo ay biyayê nan oman ni Apo Namalyari nanad ha biniyay nan oman hi Panginoon Jesu-Cristo ha kapangyarihan na.

15 Muwang yoy na ya lawini tamon ampaniwala kan Apo Jesu-Cristo, ay nakalamo ha pinakalawini na. Awta magpapawa kaw pon êt, hên kilamo ha lawini hên babayi ya magatê, ya narawak ya pamimiyay? Paan kaw manyag hên êmbayro!

16 Yarin a yo muwang, ya lalaki ya ampanakêh ha êmbayroy magatê ya babayi, ya narawak ya pamimiyay, ay mag-in mimiha tanay lawini la? Nakahulat ha Kahulatan* ya impahulat ni Apo Namalyari kan apo Moises, ya êmên di, “Hilay loway ampitakêh ay mimihay lawini.”

17 Noa, ya main pakikimiha kan Apo Jesu-Cristo, ay mimihay espiritu na haka ya Espiritu ni Apo Jesu-Cristo.

18 An-ipakihabi ko kamoyu, ya paan kaw mi-galaw ya alwan miahawa. Gawan habaytoy kasalanan ay makarêmêk hên sarilin lawini yo hên igit pon ha pamanyag hên kaatag ya kasalanan.

19 Pakaihipêñ yo, ya lawini yo ay bali hên Espiritu ni Apo Namalyari ya impahapat na kamoyu, haka ampaidi ya kamoyu. Ya lawini yo, ay alway nan kamoyu, ta kanay na.

* **6:16** Genesis 2:24.

20 Ta binayaran kaw na hêñ daya ni Apo Jesu-Cristo, kabay gamitêñ yoy lawini yo êmêñ mapuri hi Apo Namalyari.

7

Ya tungkol ha pamakiahawa

1 Amêhêñ, habaytsi ya mahabi ko tungkol ha kotang yo, ha hulat yo kangko, no mangêd ha lalaki ya paan makiahawa.

2 Gawan mal-at bahêñ ya ampigalaw ya alwan miahawa, ay mangêd ya mag-ahawa ya balang miha, ta êmêñ hila a matukso hêñ manyag karawakan kalabayan hêñ lawini.

3 Dapat tuparêñ lan miahawa ya tungkulon la ha ahawa la hêñ mitakêh.

4 Ya lawini nan babayi ay mag-in kanay nan ahawa nay lalaki, haka ya lawini nan lalaki ay mag-in kanay nan ahawa nay babayi.

5 Alwa yon iimot ya lawini yo ha miha ta miha, angga ha a yo pon napihabian hêñ ipêptêng yoy ihip yo ha panalangin hêñ ungnoy allo. Pangayari hêñ panalangin yo, ay dapat kaw na hêñ mitakêh, ta êmêñ a kaw tuksoêñ ni Satanas hêñ makilalaki o mamabayi, no a yo mapigil ya kalabayan lawini yo.

6 Habayto ya hinabi ko kamoyu, ay alwan utoh, noa, payo kon bat.

7 Labay ko dayi ya ayn kaw hêñ ahawa, hêñ nanad kangko. Noa, tsi-tsi-iha kitamon biyay ya indigalo ni Apo Namalyari. Hilay kaatag ay pinaigan na hêñ mag-ahawa, haka hilay kaatag ay pinaigan na hêñ a mag-ahawa.

8 Aralan kataw ya ayn êt ahawa, haka hikaw ya kinamatsan ahawa, ya paan kaw mag-ahawa hêñ nanad kangko ya a nag-ahawa.

9 Noa, no a yo mapigil ya lawini yo, ay mag-ahawa kaw tana. Ta mangêd ya mag-ahawa kaw kanan mag-in magulo ya nakêm yo, hêñ gawan ha kalabayyan lawini yo.

10-11 Habaytsi ya utoh ha nipag-ahawa, ay ubat ha Panginoon, alwan ubat kangko, ya paan hilan makihiyay ya babayi ha ahawa la. Embayro êt kanlan lalaki ya paan lan ihiyay ya ahawa la. Noa, no makihiyay hilay babayi ha ahawa la, ay paan hilan makilamo ha kaatag ya lalaki. Makapakiúmang hila yato ha ahawa la, no labay la.

12 Kanlan miahawa ya a pon parehon ampaniwala kan Apo Jesu-Cristo, ay habaytsi ya anhabiêñ ko. Ayn yan hinabi ya tungkol di, hi Panginoon Jesus. No main lalaki, ya ampaniwala kan Apo Jesu-Cristo, ya main ahawa ya ayn pon paniwala kan Apo Jesu-Cristo, ay a la dapat hêñ ihiyay ya ahawa la, no labay la pon hêñ makilamo kanla, ya babayi.

13 Embayro êt kanlan babayi ya ampaniwalay na kan Apo Jesu-Cristo. No a hila pon ampaniwala kan Apo Jesu-Cristo ya ahawa la, ay a la dapat hêñ ihiyay ya ahawa la, no labay lan lalaki hêñ mihundo ya pamilamo la.

14 Gawan an-itad ni Apo Namalyari hêñ malinis, ya ahawa la, ya ayn pon paniwala kan Apo Jesu-Cristo, gawan ha pakikimiha la ha ahawa lay ampaniwalay na. No alwa dayin pêtêg ya habayto, ay a na hila dayin itad hêñ malinis ni Apo Namalyari

ya anak la, noa, ha kaptêgan ay an-itad na hilan malinis.

¹⁵ Noa, no main a pon ampaniwala kan Apo Jesu-Cristo, ya labay hên mamihiyay hên ahawa la, ay paulayan yo hila. Ha êmbayro, ay pareho hilay nan nanad ayn ahawa. Ta labay ni Apo Namalyari ya ayn gulo ha pamimiyay tamo.

¹⁶ Kayno hikaw ya ampaniwalay na kan Apo Jesu-Cristo, ay mag-in dann, ta êmên ya ahawa yo ay maniwala etaman kan Apo Jesu-Cristo.

Hinoman ya pamimiyay ya naidigalo hên Panginoon kantamo, ay habaytoy dapat tamon ihundo

¹⁷ Êmbayro man, ay hi Panginoon ya namidigalo kantamo hên tsî-tsi-ihan pamimiyay, haka dapat ihundo tamoy habayto, hinagyat na kitamo man ni Apo Namalyari hên magpalokop kana. Habayto ya an-iutoh ko ha ay-atoman ya main patêl ha Panginoon ya angkapi-tsi-tsipon.

¹⁸ No alimbawa ta nag-in Cristiano hilay kapareho kon Israelita, ya impatuli hên hato, ay a la dapat ikarêng-êy ya impatuli hila. Êmbayro etaman, no nag-in Cristiano hilay a pon impatuli, ay paan hilay nan patuli.

¹⁹ Maalagá ya pamanhumonol ha utoh ni Apo Namalyari, alwan ya pamanhumonol ha manan ugali naêñ Israelita, nanad ha patuli.

²⁰ No ay-êmên ya pamimiyay tamo, hên bayo kitamo nagpalokop kan Apo Jesu-Cristo, ay êmên tana bayro ya pamimiyay tamo amêhêñ ha nagpalokop kitamina kana.

²¹ No alimbawa, ta ipoh kitamo hên nagpalokop kitamo kan Apo Jesu-Cristo, ay ihundo tamo ya

pangaipoh tamo. Noa, no labay lan amo tamo, ya ibuhan la kitamo ha pangaipoh, ay makaalih kitamina bayto ha pangaipoh tamo.

22 Ta hilay ipoh ya nagpalokop kan Apo Jesu-Cristo, ay nanad imbuhan, agyan ipoh hila pon hêñ tawo. Embayro etaman, hikitamoy alwan ipoh, ya nagpalokop kan Apo Jesu-Cristo, ay mag-in kitamon nanad ipoh ni Apo Jesu-Cristo ta huyuêñ tamo ya.

23 Gawan hikitamoy nagpalokop kan Apo Jesu-Cristo, ay binayaran kitaminan daya ni Apo Jesu-Cristo. Kabay paan kitamon paipoh ha kaatag.

24 Hikaw ya patêl ko ha Panginoon, hinoman ya pamimiyay tamo, hêñ a kitamo pon nagpalokop kan Apo Jesu-Cristo, ay kailangan ihundo tamo ya habayto, hêñ main pamakilamo kan Apo Namalyari.

Ya kotang ya tungkol kanlan ayn ahawa

25 Amêhêñ, patêl ko ha Panginoon, hikaw etaman ya ayn ahawa, ay ayn akon utoh ya ubat ha Panginoon ya tungkol di. Noa, gawan ha hikoy mihay mapaypaniwal-an hêñ Panginoon, ay aralan kataw ha ingalo na.

26 Gawan ha kairapan amêhêñ, ya mangêd, ay paan pon makiahawa.

27 Hikaw ya lalaki, no main kaw hêñ ahawa, ay paan yo hilan ihiyay. Haka no ayn kaw êt hêñ ahawa, ay paan kaw pon makiahawa.

28 Noa, no makiahawa kaw, ay alwan kasalanan ya habayto. Embayro etaman kanlan dalaga, ay alwan kasalanan no makiahawa hila. Noa, labay

kon midayo kaw ha kairapan ya angkaranasan lan nipag-ahawa.

29 Êmén ya di ya labay kon mamwangan yon patêl ko ha Panginoon: Pêrad tanay panaon para huyuên ya Panginoon. Kabay paubat amêhêñ, ay dapat huyuên lan nipag-ahawa ya Panginoon hêñ nanad kanlan ayn ahawa.

30 Hikaw ya ampaglungkot, ay ihundo yoy pamaghuyo yo ha Panginoon hêñ ahina ampangabala kamoyu ya an-ikalungkot yo. Hikaw etaman ya main ikahigla, ay ihundo yoy pamaghuyo yo hêñ ahina ampangabala kamoyu ya an-ikahigla yo. Hikaw ya main hinaliw, ay ihundo yoy pamaghuyo yon nanad hêñ ayn kamoyu ya hinaliw yo.

31 Paan tamon ubuhêñ ya hêkaw tamo ha hinoman di ha luta. Ta ahina hêñ mabuyot ya hata luta.

32 A ko labay ya maabala kaw. Hikitamoy lalaki, ya ayn ahawa, ay maiubuh tamoy hêkaw tamo ha ikahigla hêñ Panginoon.

33 Noa, hilay lalaki, ya main ahawa, ay maubuh ya hêkaw la di ha luta, no ay-êmén lan mapahigla ya ahawa la,

34 kabay loway an-ihipêñ la. Êmbayro êt etaman hilay babayi ya ayn ahawa, haka hilay dalaga pon. Maiubuh lay sarili la ha pamaghuyo ha Panginoon. Noa, ya ampansinêñ lan babayi ya nag ahawa, ay tungkol di ha luta, ta labay lan mapahigla lay ahawa la.

35 Anhabien koy habaytsi kamoyu ha ikakangêd yo. Alwan ha an-igpitana kataw. Labay kon bêngat ya ayn makaabala kamoyu ha hêpat haka mangêd ya pamaghuyo yo ha Panginoon.

36 Tungkol etaman ha mikabaan, ya ampiakono no ihundo lay kasal la, ay habaytsi ya aral ko kanla: no ya ihip hēn lalaki ay nakapéptēng ha kabaan na, ay kailangan ihundo lay kasal la. Alwan kasalanan ya habayto, ta napikasundo hilay nan mikasal.

37 Noa, no ayn ha nakêm hēn lalaki ya makiyahawa, ta main yan pamagpigil ha sarili na, ta tinalagá nay na ya a ya makiahawa, ay mangêd ya paan hilay nan makiahawa.

38 Kabay mangêd ya mag-ahawa, noa, ya mangêd pon, ay paan mag-ahawa.

39 Hilay babayi ya main ahawa, ay dapat makilamo ha ahawa la, kaban angkabiay hila pon. Noa, no matsi ya ahawa la, ay malyari hilan makiahawa ha hinon labay la, no kapareho lan ampaniwala kan Apo Jesu-Cristo.

40 Noa, ihip ko, ay mahigla hila no paan hilay nan makiahawan oman. Haka muwang ko, ay atsi kangko etaman ya Espiritu ni Apo Namalyari.

8

Ya pamangan ya imparaêp ha ansimbaên lan kaatag

1 Amêhêñ, patêl ko ha Panginoon, ipalinaw ko kamoyu ya tungkol ha pamangan ya imparaêp ha arapan lan ansimbaên lan kaatag.

Ya balang miha kantamo ay main kamwangan. Ya kamwangan ay mangihobohob kantamo hēn mag-in mapagmatag-ay. Noa, no milulugud kitamo, ay ampatanihēñ tamoy kapareho tamo.

² No êndat tamo ya hukad ya kamwangan tamo, ay a tamo awud muwang ya main kitamo pon hêñ dapat mamwangan.

³ Noa, kilala ni Apo Namalyari ya balang ampanlugud kana.

⁴ Amêhêñ, pakibatan koy kotang yoy tungkol ha pamangan ya imparaêp ha ansimbaêñ lan kaatag, ya rebulto, ya alwan pêtêg ya diyos. Muwang tamo ya ayn hilan pukat, ta mimihay Diyos haka yabay ya hi Apo Namalyari.

⁵ Mal-at man ya alwan pêtêg diyos ya anhabiêñ la, ya atsi kano ha langit haka ha luta, ya êndat lan pêtêg hêñ diyos haka panginoon, ay

⁶ para kantamon ampaniwala kan Apo Jesu-Cristo, ay mimihay Diyos. Yabay ya hi Apo Namalyari ya Tatang tamo, ya nanyag hêñ kaganawan. Ampamiyay kitamo ta êmêñ humuyo haka magsimba kana. Mimihay Panginoon tamo. Yabay ya hi Apo Jesu-Cristo ya kalamo ni Apo Namalyari hêñ nanyag hêñ balang hino, haka hiyay namiúmang kantamo kan Apo Namalyari.

⁷ Noa, main ampaniwala kan Apo Jesu-Cristo, ya a ampakaintindi ya mimiha ni Apo Namalyari ya main kapangyarihan, ta sanay hilay na ha alwan pêtêg ya diyos ya mana lan ansimbaêñ, haka êndat la pon ya main hilan hêkaw. Kabay no mangan hilan imparaêp kanlan habayto, ay ampanyag hilan bawal ha konsinsya la.

⁸ Noa, alwan pamangan ya makapiúmang kantamo kan Apo Namalyari. Ayn kana no mangan kitamon imparaêp o no a tamon kaêñ ya habayto.

⁹ Noa, kaillag kitamo ta agyan ayn pamangan ya

bawal kantamo, ay kayno hikitamoy mag-in pangubatan kasalanan hên kaatag, ya ampag-alangan pon no binawal ni Apo Namalyari ya mangan hên imparaêp ha alwan pêtêg ya diyos.

¹⁰ Hikaw ya ampakaintindi ya ayn paman-gan ya bawal, ay paan kaw bat hên mangan hên imparaêp ha arapan hên alwan pêtêg ya diyos. Kayno main makahêlêk kamoyu ya ampag-alangan pon no binawal ni Apo Namalyari ya habayto, haka matukso hilan mangan hên bawal ha konsinsya la.

¹¹ Kabay gawan ha pamangintindi yo, ya ayn pamangan ya bawal, ay nakadyag kasalanan hilay patêl tamo ha Panginoon ya ampag-alangan pon no binawal ni Apo Namalyari ya mangan hên imparaêp ha alwan pêtêg ya diyos. Hila man ay patêl tamo ha Panginoon ya inlitas gawan ha kamatsan ni Apo Jesu-Cristo.

¹² Gawan nangan kaw hên habayto, ay nakadyag kaw hên kasalanan kanlan ampag-alangan pon, no pêtêg nan binawal ni Apo Namalyari ya mangan hên imparaêp ha alwan pêtêg ya diyos, haka nakadyag kaw hên kasalanan kan Apo Jesu-Cristo.

¹³ Kabay para kangko, no mikasalanan hilay ampag-alangan pon no binawal ni Apo Namalyari ya mangan hên imparaêp ha alwan pêtêg ya diyos, gawan ha ampangan akon imparaêp, ay a kina kaén ya habayto, ta êmén hila a mikasalanan ya patêl ko ha Panginoon.

A ya nanggamit hên karapatan na ha pangaa-postol na hi apostol Pablo

¹ Yarin ayn akon karapatan hên manyag hên hinon labay kon daygên, ya a mantan ha kasalanan! Yarin alwa kon mantêg apostol hên Panginoon tamon Jesu-Cristo!* Yarin a ko ya nahêlêk! Hikaw bay ya tistigos ya hikoy mihay tagahuyo na, ta naniwala kaw kana hên nanoro ko kamoyu.

² Agyan a la kon ambalayên apostol hên kaatag, ay ayn ya habayto. Noa, hikaw, ay dapat muwang yoy na, gawan ha pakikimiha yo kan Apo Jesu-Cristo, ya ampamaptêg ha pangaapostol ko.

³ Habaytsi ya anhabiên ko kanlan ampamintas kangko.

⁴ Pakaihipên yo ya tungkulon hên mihay apostol. Yarin ayn kay hên karapatan hên pakanên hên antoroan naên!

⁵ No alimbawa ta main akon ahawa ya ampaniwala kan Apo Jesu-Cristo, ay yarin a ko ya magêtan no an-ipamwang ko ya Mangêd ya Habi tungkol kan Apo Jesu-Cristo, nanad kanlan Pedro haka hilay patêl ni Apo Jesu-Cristo, ya anggêtan lay ahawa la ha anlakwên la!

⁶ Yarin lo-lowka kay ni Bernabe ya ayn karapatan hên iubuh ya hêkaw naên ha panoro hên tungkol kan Apo Jesu-Cristo!

⁷ Alimbawa, yarin ayn suweldo hilay hundaloh! Yarin a la pakinabangnan hên main tanaman, ya tagêy hên tanaman la! Yarin a pakinabangnan hên ampanayhay hên ayop ya ayop la!

⁸ Ya anhabiên ko ay alwan bêngat ugali tamo,

* **9:1** Dyag 9:1-7.

noa, nakahulat etaman ha Kautuhan ya impahulat ni Apo Namalyari.

⁹ Emén ya di ya nakahulat ha Kautuhan ni Apo Namalyari ya impahulat na kan apo Moises: “Alwa yon bawalên ya ayop yo hêñ mangan no anggamitén yo yan panggiék.”[†] Yarin impahulat ni Apo Namalyari ya habaytsi gawan bêngat ha ayop!

¹⁰ Alwa! Ta hikay ya apostol, ya in-alimbawa na bayro. Hilay manyarol haka hilay manggapah ay maêngganan lay atag la.

¹¹ Ya panoro naêñ kamoyu ay nanad ha nangitanêm kay hêñ habi ni Apo Namalyari ha nakém yo. Kabay main kay hêñ karapatan hêñ mananggap hêñ kailangan naêñ ha allo-allo.

¹² No hilay kaatag ya ampanoro kamoyu ay main maêngganan, ay hikay pon ya dapat main maêngganan, ta hikay ya nunan nanoro kamoyu.

Noa, a naêñ ginamit ya karapatan naêñ ha pangAAPSTOL, ta tinéêh naêñ tana ya kairapan, ta êmén kay a mag-in habkol ha paniwala yo ha Mangêd ya Habi tungkol kan Apo Jesu-Cristo.

¹³ Muwang yo bay, ya hilay pari ya ampaghuyu ha Templo, ay andyanan hêñ pamangan.[‡] Haka hilay ampaghuyu ha pamiulaman hêñ an-iátang kan Apo Namalyari, ay andyanan hêñ atag ha imparaêp.

¹⁴ Embayro etaman ya pan-iutoh hêñ Panginoon, ya hilay ampanoro hêñ Mangangêd ya Habi ya tungkol kan Apo Jesu-Cristo, ay dapat dyanan hêñ kaganawan kailangan la hêñ antoroan la.[§]

[†] **9:9** Deuteronomio 25:4. [‡] **9:13** Deuteronomio 18:1-4. [§] **9:14** Mateo 10:10, Lucas 10:7, 1 Timoteo 5:17.

15 Noa, hiko, ay a ko ginamit ya karapatan ko ha pangaapostol. Haka a kataw anhulatan amêhên, ta êmên kikwan hawop yo. Mangêd ya matsi ko pon, kanan alihêng kangko ya malyari kon ipagmahlay, ya a ko ampakikwa hêng main ako man hêng karapatan hêng êngganan kamoyu.

16 A ko labay habiêng ya an-ipagmahlay ko ya panoro kon Mangangêd ya Habi ya tungkol kan Apo Jesu-Cristo, ta anhonolêng kon bat ya in-utoh kangko. Kaingalo ko no a ko itoro ya hata Mangêd ya Habi, ya tungkol kan Apo Jesu-Cristo.

17 No alimbawa ta hiko ya namili hêng magin mánoro hêng habayto, ay manapol ako bayton suweldo. Noa, ampanoro ko gawan impatsiwala ni Apo Namalyari ya habaytoy pamanoro kangko.

18 Hino bayto ya makwa ko ha pagal ko? Ayn kaatag no alwan ya kahiglaan ko ha panoro hêng Mangêd ya Habi tungkol kan Apo Jesu-Cristo, hêng ayn suweldo, main ako man karapatan hêng mananggap hêng suweldo.

19 Alwa kon ipoh hêng hinoman ya tawo. Noa, nanad an-itad kon ipoh ya sarili ko ha balang miha, ta êmên ako hêng makaakay hêng mal-at ya tawo hêng maniwala kan Apo Jesu-Cristo.

20 No kalamo ko hilay kapareho kon Israelita, ay ampakilamo ko kanla hêng mangêd, ta êmên ko hila maiakay kan Apo Jesu-Cristo. Êmbayro man ya ayn kina ha aypa hêng Kautuhan ya impahulat ni Apo Namalyari kan apo Moises, ay anhonolêng kon pon ya habaytoy Kautuhan, ta êmên ko hila maiakay hêng maniwala kan Apo Jesu-Cristo.

21 Êmbayro etaman, no kalamo ko hilay ayn ha

aypa hēn Kautuhan ni Apo Namalyari, hilay alwan Israelita, ay ampakilamo ko kanla, ta êmēn ko hila maiakay kan Apo Jesu-Cristo. Ta no anhonolēn koy in-utoh ni Apo Jesu-Cristo, ay anhonolēn ko êt bayto ya Kautuhan ni Apo Namalyari.

²² No kalamo ko hilay alwan nakataniêh ha paniwala kan Apo Jesu-Cristo, ay ampakilamo kon mangêd kanla, ta êmēn ko mapataniêh ya paniwala la. Ampakilamo kon mangêd ha balang miha, ta êmēn ko hila maiakay hēn maniwala kan Apo Jesu-Cristo, hinoman ya kailangan kon daygên.

²³ An-ubuhêh kon daygên ya habayto, ta êmēn hiko man ay makapakiyatag ha ingalo ya an-idin ni Apo Namalyari gawan ha Mangêd ya Habi tungkol kan Apo Jesu-Cristo.

²⁴ Muwang tamo ya ha mihay hali-tagtagan ay ampakiwanan lan kal-atan ya primyo, noa, mimihan bêngat ya makakwan habayto. No ipantag tamoy pamanhumonol tamo kan Apo Jesu-Cristo ha mihay hali-tagtagan ya main primyo, ay dapat pakikwanan tamon huyuêh mangêd hi Apo Namalyari, ta êmēn tamo makwa ya primyo.

²⁵ Hilay ampammayu ha hali-tagtagan ay main pamagpigel ha sarili haka allo-allo hila hēn ampakapagsanay, ta êmēn la makwa ya mihay primyo ya tampol mahira. Noa, ya ampakikwanan tamon anhumonol kan Apo Jesu-Cristo, ay ayn anggaan.

²⁶ Kabay nanad akon mihay ampuwayu ha hali-tagtagan, ya a ampihayahay ha dapat nan danan, ya ayn têgêh ha puwayu hēn angga ha milatêng

ya ha pianggaan. Nanad ako etaman hên mi-hay boksingero, ya ampakatumbuk hên kailangan nan tumbukêñ.

²⁷ Main akon pamagpigil ha sarili ko, ta êmêñ ko a madyag ya karawakan kalabayan hên lawini ko. Ta kayno ubat kon impamwang ha kaatag no ay-êmêñ makwa ya primyo, ay hiko pon êt ya a makakwa hên habayto.

10

Paan magsimba ha alwan pêtêg ya diyos

¹ Patêl ko ha Panginoon, main akon labay hên ipaihip kamoyu ya nalyari hên hato ha ninuno naêñ hên Israelita, ha panaon ni apo Moises. Ha pamammita lan ubat ha bansan Egipto, ay naubuh hilan hinaninungan ni Apo Namalyari hên lêmm. Haka naubuh hilan namatah ha am-baêgêñ lan Dagat ya Naorit.*

² Ya pamangillag kanla hên ginêm, haka ya pamagbatah la ha Dagat ya Naorit ay, yabay ya nanad pangabawtismo la, ta êmêñ mamwangan ya anhumonol hila kan Moises.

³ Naubuh hilan nangan hên pamangan ya indin ni Apo Namalyari ya ubat ha langit.†

⁴ Haka naubuh hila etaman hên ninêm ha lanêm ya impaawah na ha bato. Ya alimbawa hên habay-toy bato, ay hi Apo Jesu-Cristo, ya mantêg lan kalamo ya nam-i kanla hên kailangan la.‡

⁵ Êmbayro man, ya kal-atan kanla ay a an-ikahigla ni Apo Namalyari, kabay pinatsi hila,

* **10:1** Exodus 13:21, 22, Exodus 14:22-29.

† **10:3** Exodus 16:35.

‡ **10:4** Exodus 17:6; Bilang 20:11.

haka ya but-o la, ay nikalat bayro ha kabalahan-balahan.§

⁶ Habaytoy nalyari kanlan ninuno naên Israelita, ay alimbawa haka aral kantamo. Paan tamon labayêñ ya karawakan hêñ alwan nanad kanlan ampanlabay hêñ alwa lan ikakangêd.*

⁷ Paan kitamon magsimba ha alwan pêtêg ya diyos, hêñ êm  n kanlan kaatag ninuno, hêñ hato. Ta nakahulat ha kahulatan ni Apo Namalyari, ya wana, “Nipammikno hila hêñ nangan haka nin  m ha nagkaluto, haka nipaghayaw hila   t ha pamag-puri kanan habaytoy alwan pêtêg diyos.”†

⁸ Paan kitamon manyag hadyay karawakan kalabayan lawini, hêñ êm  n ha dinyag lan kaatag hêñ hato, gawan dinyag lay habayto, ay pinatsi ya main lowampo boy tatlon libo ha mihay allo.‡

⁹ Haka paan tamon subuk  n ya Panginoon hêñ êm  n ha dinyag lan kaatag hêñ hato, hêñ pinatsi hila hêñ utan.§

¹⁰ Haka paan kitamon nagmulongan hêñ nanad ha dinyag lan kaatag hêñ hato. Gawan ha nagmulongan hila ay impapatsi hila ni Apo Namalyari ha Anghel hêñ kamatsan.*

¹¹ Ya nalyari kanlan ninuno na  n hêñ Israelita, ay alimbawa ha bawal hêñ dayg  n. Haka inhulat ya habaytsi ta êm  n mag-in aral kantamo. Ta hatsi ya ampaidyanan tamoy luta ay main anggaan.

¹² Kabay hinoman kantamo ya ampangihip ya hiyay napah-  y ha paniwala, ay dapat kaillag, ta

§ **10:5** Bilang 14:29, 30. * **10:6** Bilang 11:4. † **10:7** Exodo 32:6.

‡ **10:8** Bilang 25:1-18. § **10:9** Bilang 21:5, 6. * **10:10** Exodo 12:23; Bilang 14:1-38, 16:41-49.

kayno matukso ya.

¹³ Ayn panubuk ya nilumatêng kantamo ya a pon dinanas hên kaatag. Tapat hi Apo Namalyari, haka a na paulayan hên subukan kitamo hên igit ha matêêh tamo, ta dyanan na kitamo hên hêkaw ta êmén mapagtêêhan haka mahambut tamoy habayto.

¹⁴ Kabay anlugarêñ kon patêl, paan kaw magsimba ha alwan pêtêg ya diyos.

¹⁵ Magaling kaw hên ampangihip, kabay manimbâgan kaw dayi ha anhabiên ko no pêtêg ya, o alwa.

¹⁶ Alimbawa, no magkomunyon kitamo, ay an-ipagpahalamat tamo ya daya haka lawini ni Apo Jesu-Cristo, ya pinangubatan hên pakikimiha tamo kana, haka ya pakikimiha tamon ampaniwala kana. Ya puto ay boo, ta êmén kitamo mapiaaêm.[†]

¹⁷ Mal-at kitamo man, ay nanad mimiha kitamo, gawan ha pakikimiha tamo ha pinakalawini ni Apo Jesu-Cristo, ya nanad ha puto ya boo, ya binihil, ta êmén kaganawan tamo ay makaêkan.

¹⁸ Ihipêñ yon kapareho kon Israelita. Main hilan pakikimiha kan Apo Namalyari, no ampangan hilan an-iparaêp la kana.[‡]

¹⁹ Ha pamawal ko kamoyu hên mangan hên imparaêp ha rebulto hên alwan pêtêg ya diyos, ay taganán alwan labay habiên ya main alagá ya habaytoy imparaêp. Embayro etaman, ay taganán ayn alagá ya alwan pêtêg ya diyos.

[†] **10:16** Mateo 26:26-28, Marcos 14:22-24, Lucas 22:19, 20.

[‡] **10:18** Deuteronomio 14:22-27.

20 Ha kaptēgan, ya an-iparaêp lan a ampagpalokop kan Apo Namalyari ha arapan hēn alwan pêtēg ya diyos, ay an-iparaêp la ha nangarawak ya a angkahélêk, ya kalamo ni Satanas, alwa kan Apo Namalyari. A ko labay ya main kaw hēn pakikim-ihā kanlan nangarawak ya a angkahélêk.[§]

21 Bawal hēn magkomunyon ha arapan ni Apo Namalyari no ampangan haka ampinêm kaw hēn imparaêp kanlan nangarawak ya a angkahélêk.

22 No ihundo yoy pangan yo hēn imparaêp kanlan nangarawak ya a angkahélêk, ay ampaimonên yoy Panginoon. Yarin matakahan tamoy pamarusa ni Apo Namalyari!*

23 Main ampaghabin madyag tamo ya hinon labay tamon daygēn. Pêtēg ya habayto. Noa, main dyag ya alwan ha ikakangêd hēn kapareho tamo. Haka ya kaatag ya dyag ay makahabkol ha pangakay hēn kapareho tamo hēn maniwala kan Apo Jesu-Cristo.[†]

24 Dapat tamon daygēn ya ikakangêd hēn kapareho tamo, alwan bêngat ya ikakangêd hēn sarili tamo.

25 Malyari tamon kênaêñ ya hinoman ya kêna ya an-ihaliw la ha palengke hēn ayn pag-alangan no imparaêp ha alwan pêtēg ya diyos ya habayto, ta êmêñ a yumagah ya nakêm tamo.

26 Ta ayn bawal ya hinon maêkan, gawan nakahulat ha Kahulatan ni Apo Namalyari, ya wanana hulat, “Ya luta haka ya atsi ha luta ay kanan Panginoon.”‡

§ **10:20** Deuteronomio 32:17. * **10:22** Deuteronomio 32:21.

† **10:23** 1 Corinto 6:12. ‡ **10:26** Awit 24:1.

27 Kabay, no hagyatêñ kitamo hêñ mangan ha bali hêñ a pon nagpalokop kan Apo Jesu-Cristo, ay mangan kitamo tana, hêñ paan kitamon mangotâng no imparaêp ya habayto ha alwan pêtêg ya diyos, ta êmêñ a yumagah ya nakêm tamo.

28 Noa, no main maghabi kantamo, ya imparaêp ya habayto ha alwan pêtêg ya diyos, ay paan kitaminan mangan, ta êmêñ a mag-in habkol kanlan namihumbung kantamo, haka ta êmêñ a yumagah ya nakêm

29 lan habaytoy namihumbung kantamo. Ta hinoy makwa tamo no ipalêkpêk tamoy karapatan tamo hêñ mangan hêñ habaytoy imparaêp, no êndat lan namihumbung ya kasalanan hêñ mangan habayto?

30 Haka hino awud ya makwa tamo, no isadsad tamo hêñ mangan hêñ naipahalamat tamina kan Apo Namalyari, no pintasan kitamo hêñ habaytoy namihumbung kantamo? Ayn bay!

31 Ya dapat, ay ha pangan tamo, o pamminêm, o hinoman ya andaygên tamo, ay ihipêñ tamo ya ikapuri ni Apo Namalyari.

32 Dapat ayn mahêlêk ha pamimiyay tamo ya mag-in habkol ha pangakay hêñ hinoman hêñ maniwala kan Apo Jesu-Cristo, Israelita man o alwa. Haka paan kitamon manyag hêñ hinoman ya pangubatan hêñ matukso ya kapareho tamon ampaniwala kana.

33 Daygên yo dayi ya andaygên ko. Ampakik-wanan kon mapahigla ya balang miha ha kaganawan dyag ko. A ko antsikapêñ ya sarili kon ikakangêd. Ta antsikapêñ koy ikakangêd hêñ kal-

atan, ta êmêñ ko hila maiakay kan Apo Jesu-Cristo.

11

¹ Manungtung kaw kangko hêñ êmêñ ha panungtung ko kan Apo Jesu-Cristo.*

Ya mihay ugali ha pamagsimba, haka tungkol ha pagpalokop

² Andayêwêñ kataw ta anhonolêñ yoy intoro ko kamoyu ha hinoman ya andaygêñ yo, haka anhonolêñ yoy ugali ha pamagsimba ya intoro ko kamoyu.

³ Noa, labay kon maintindihan yo, ya balang lalaki, ay atsi ha lokop ni Apo Jesu-Cristo. Hilay babayi etaman, ay atsi ha lokop hêñ ahawa la. Hi Apo Jesu-Cristo etaman ay atsi ha lokop ni Apo Namalyari.

⁴ Kabay ha pamagsimba tamo, no alimbawa ta main lalaki ya nakabawmbong, ya ampanalangan, o ampamipamwang hêñ an-ipaihip ni Apo Namalyari kana, ay ampam-in dêng-êy kan Apo Jesu-Cristo, ya ampanlokop kana.

⁵ Haka no alimbawa ta main babayi ya ayn bawmbong ya ampanalangan, o ampamipamwang hêñ an-ipaihip ni Apo Namalyari kana, ay ampam-i yan dêng-êy ha ahawa nay ampanlokop kana. Nanad yan babayi ya kinalbo, ya kaparêng-êy.

⁶ No main babayi ya a mabay hêñ magbawmbong, ya mangêd, ay pakalbo ya tana. Noa, gawan kaparêng-êy hêñ pakalbo, ay dapat magbawmbong ya.

* **11:1** 1 Corinto 4:16, Filipos 3:17.

⁷ Hikitamoy lalaki etaman, ay paan magbawmbong, gawan hikitamoy panlêkan hên itsura haka tungkulan ni Apo Namalyari. Noa, hilay babayi ay panlêkan hên tungkulan hên lalaki, kabay dapat magbawmbong hila.[†]

⁸ Gawan hên dinyag ni Apo Namalyari, ya unan lalaki haka babayi, ya babayi ay dinyag ha tagyang hên lalaki. Alwan lalaki ya dinyag ha tagyang hên babayi.

⁹ A na etaman dinyag ni Apo Namalyari ya lalaki ha ikakangêd hên babayi. Noa, dinyag nay babayi ha ikakangêd hên lalaki.[‡]

¹⁰ Kabay dapat magbawmbong hilay babayi, kamwangan hên hilay ampagpalokop ha ahawa la, ta êmèn hila man ya anghel ni Apo Namalyari, ay mamwangan, ya kamwang hilan mam-in galang ya hilay babayi.

¹¹ Embayro man, ha pakikimiha tamo ha Panginoon, ay kailangan lan babayi ya lalaki. Haka kailangan lan lalaki ya babayi.

¹² Gawan ya unan babayi ay dinyag man ni Apo Namalyari ha tagyang hên lalaki, ay paubat hên habayto, ay balang lalaki ay in-anak hên babayi. Haka hi Apo Namalyari ya ampangubatan hên balang miha haka ya kaganawan dinyag.

¹³ Amêhén, manimbángan kaw no hépat ha mi-hay babayi hên magbawmbong no manalangin ya kan Apo Namalyari ha arapan hên kaatag!

¹⁴ Paubat hên haton lagi, ay atsi ha ihip hên tawo, ya kaparêng-êy ya lalaki ya makarang ya habot.

† 11:7 Genesis 1:26-27. ‡ 11:9 Genesis 2:18-23.

¹⁵ Noa, ikahampat hên babayi, no a na potohêñ ya habot na. Ta indin kana ni Apo Namalyari ya habayto hên pinakabawmbong na.

¹⁶ No labay yon makihubakan tungkol bayro, ay mahabi ko, ya habaytoy mana kinan ugali, haka manay nan ugali lan kapareho kon patêl ha Panginoon ya angkapi-tsi-tsipon ha kaatag ya logal.

Komunyon, ya pamangan ya in-utoh ni Apo Jesu-Cristo

(Mateo 26:26-29; Marcos 14:22-25; Lucas 22:14-20)

¹⁷ Ha humonol ya toro, ay a kataw malyarin dayêwêñ, gawan ya pamit-si-tsipon yon patêl ha Panginoon, ay alwan ha ikakangêd yo, ta ha ikadawak yo awud ya habain.

¹⁸ Una, ay ipamwang ko kamoyu, ya nabalit-an ko, ya ayn kaw hên pakikimiha ha pamit-si-tsipon yon patêl ha Panginoon. Siguro pêtêg ya nabalit-an ko.

¹⁹ Kailangan ya habayto, ta êmén mamwangan no hino kamoyu ya mantêg hên ampaniwala.

²⁰ Ha pamit-si-tsipon yon patêl ha Panginoon, ay a yo ya awud an-ihipêñ ha pagkomunyon yo, nanad ha in-utoh na kantamo.

²¹ Ta ha pangan yo, ay a kaw ampiênggan. Ta main munan mangan haka minêm hên main kahibaan, kabay main hên ahina kaêkan haka ya kaatag ay ampipaglahing.

²² Yarin ayn kaw hên sarily bali! Dapat mangan haka minêm kaw pon ha bali yo, ta êmén yo a hibaan ya lamo yo ha pamit-si-tsipon yo hên magkomunyon. Dapat yon daygêñ ya habayto,

ta êmên yo a musmusêñ hilay ampaniwala kan Apo Jesu-Cristo, haka ta êmên yo a ipakarêng-êy ya mangairap. Hino pon ya mahabi ko kamoyu? Êndat yon dayêwêñ kataw? A ko!

²³ Intoro kina kamoyu, ya toro, ya tinanggap ko kanan Panginoon Jesus, ya êmên ya di: Ha yabin in-upit hi Panginoon Jesus, kaban ampangan ya hêñ kalamo na hilay labinloway tagahonol na, ay nandampot yan puto, ta

²⁴ impahalamat nay habayto kan Apo Namalyari, haka na pino-potoh, ta wana, “Habaytsi ya lawini ko, ya an-idin ko ha ikakangêd yo. Dapat panay yon daygêñ ya habaytsi, ta êmên yo ko maihipan.”

²⁵ Embayro êt, hêñ nayari hilan nangumapon, ay nandampot yan pamminêman ya nag alak, ta wana, “Habaytsi ya daya ko ya nanad pinakapirma hêñ bayoy kahundoan ni Apo Namalyari, haka hilay pinili na hêñ mag-in kana. Inêmên yoy habaytsi, haka balang kaw minêm, ay dapat yo kon panêmtêmêñ.”§ Embayro ya in-utoh ni Panginoon Jesus.

²⁶ Ta balang kaw magkomunyon, hêñ angga ha pag-orong na di, ay an-ipamwang yo ya natsi ya hi Panginoon Jesus.

²⁷ Kabay no bat kaw hêñ magkomunyon, hêñ alwan hêpat ya an-ihipêñ o ya andaygêñ yo, ay taganán mikasalanan kaw, ta andaygêñ yon ayn alagá ya lawini haka daya na.

²⁸ Kabay bayo kitamon magkomunyon, ay pakapoliahêñ tamoy nakêm tamo hêñ kikwan

patawad ha nadyag tamoy kasalanan.

²⁹ Ta no a tamon ampaalagaan ya lawini hēn Panginoon, ha pamagkomunyon tamo, ay parusaan kitamo.

³⁰ Kabay mal-at kamoyu ya ampaghakit haka ayn higlay lawini, haka main nanan natsi.

³¹ Noa, no pakapoliahēn tamoy nakēm tamo, hēn kikwan patawad ha nadyag tamoy kasalanan, bayo kitamo magkomunyon, ay a kitamo bayton parusaan hēn Panginoon.

³² Noa, no amparusaan na kitamon Panginoon, ay an-itoynong na kitamo, ta êmēn kitamo a mipalako ha impiyerno, hēn kalamo lan a ampagpalokop kan Apo Namalyari.

³³ Kabay patēl ha Panginoon, no magkomunyon kaw, ay miêënggan kaw.

³⁴ No anlonohēn kaw, ay dapat mangan kaw pon ha bali yo, bayo kaw mi-tsi-tsipon ta êmēn a kaw parusaan ni Apo Namalyari. Ya tungkol ha kaatag ya labay kon ipamwang kamoyu, ay itoro ko tana ha paglatêng ko bahēn.

12

Ya kagalingan, pamangintindi haka kaatag ya an-idigalo nan Espiritu ni Apo Namalyari

¹ Amêhēn, hikaw ya patēl ko, ay labay kon mamwangan yoy kaptégan ya tungkol ha an-idigalo nan Espiritu ni Apo Namalyari.

² Muwang yo, ya hēn haton a kaw pon am-pagsimba kan Apo Namalyari, ay angkaamuyot kaw hēn magsimba ha rebulto hēn alwan pêtêg ya diyos, ya a kahabi.

³ Kabay an-ipamwang ko kamoyu, ya no atsi kantamo ya Espiritu ni Apo Namalyari, ay a tamo maihumpa hi Apo Jesu-Cristo. Haka ayn makapaghabi, ya hi Apo Jesu-Cristoy Panginoon, no ayn kana ya Espiritu ni Apo Namalyari.

⁴ Hino-hino kay na hēn ya galing haka pamang-intindi ya an-idigalo hēn Espiritu ni Apo Namalyari kantamo, noa, mimiha na ya ampamidigalon habayto.

⁵ Ya pamaghuyo tamo ay alwan pare-pareho. Noa, mimihay Panginoon ya ampaghuyuan tamo.

⁶ Alwan pare-pareho ya andaygēn nan kapang-yarihan ni Apo Namalyari ha biyay tamo, noa, mimiha na ni Apo Namalyari ya ubatan hēn kapangyarihan ya atsi kantamo.

⁷ Ya balang miha kantamon ampaniwala kan Apo Jesu-Cristo, ay andyanan nan Espiritu ni Apo Namalyari hēn tsı-tsihan galing ha ikakangēd tamon angkapi-tsi-tsipon. Habaytsi ya galing ay ampamaptēg hēn atsi kantamo ya Espiritu na.

⁸ Ya kaatag ay andyanan nan Espiritu hēn galing hēn mamipamwang hēn kamwangan ya ubat kan Apo Namalyari, haka ya kaatag, ay andyanan nan galing hēn mamipamwang hēn tungkol kan Apo Namalyari.

⁹ Ya kaatag ay andyanan nan makhaw ya paniwala ha kapangyarihan ni Apo Namalyari. Ya kaatag ay andyanan nan kapangyarihan hēn mamaalih hēn hakit.

¹⁰ Ya kaatag ay andyanan nan kapangyarihan hēn manyag kapapaêpapah. Ya kaatag ay andyanan nan galing haka hēkaw nakêm hēn mamipamwang hēn an-ipaihip na kanla. Ya

kaatag, ay andyanan nan kagalingan hên manimbangan, ta êmên la mamwangan ya pêtêg ya indigalo na, o no ubat kanlan Satanas. Ya kaatag, ay andyanan nan kagalingan hên maghabi ha hino-hino kay na hên ya habi ya a tamo muwang. Haka kanlan kaatag êt, ay andyanan nan pamang-intindi, ta êmên la ipamwang ya impahabi na kanlan habaytsi.

¹¹ Mimiha nan Espiritu ni Apo Namalyari ya ampamidigalo hên habayto. Hiyay ampam-i kantamon balang miha ya ampaniwala kan Apo Jesu-Cristo, hên tsî-tsihan galing ha labay nan idin.*

Ya kabooan lawini

¹² Ya lawini tamo ay kabooan hên ulo, mata, bitsih, haka mal-at pon ya pinilalamo. Agyan mal-at ya pinilalamo, ta êmên maboo ya lawini tamo, ay mimihay lawini tamo. Embayro etaman hi Apo Jesu-Cristo, haka hikitamoy kal-atan ya pinakalawini na.[†]

¹³ Ta binawtismoan kitamina ha Espiritu ni Apo Namalyari ya mimiha. Kabay nag-in kitamon kalamo ha pinakalawini ni Apo Jesu-Cristo, Israelita kitamo man, o Griego kitamo, o ipoh kitamo man, o alwan ipoh, ta hinapatan kitamon mimihay Espiritu, yabay ya Espiritu ni Apo Namalyari.

¹⁴ Ya pamilalamo tamon patêl ha Panginoon ay maialimbawa ha mihay lawini, ya mal-at ya pinilalamo, ta êmên ya maboo.

¹⁵ Alimbawa, no habiên hên bitsih, ya alwa hilan gamêt, kabay alwa hila kanon kalamo ha lawini

* ^{12:11} Roma 12:6-8. † ^{12:12} Colosas 1:18.

tamo, ay agyan habiên lay habayto, ay taganán nakalamo hila ha lawini tamo.

¹⁶ Embayro etaman no alimbawa ta habiên hén têkk ya alwa hilan mata, kabay alwa hila kanon kalamo ha lawini tamo, agyan êmbayro ya habiên la, ay taganán nakalamo hila ha lawini tamo.

¹⁷ No panay tanan mata, ya kabooan hén lawini tamo, ay hino bayto ya panggilam tamo? No panay etaman têkk ya kabooan lawini tamo, ay hino awud ya pandaêp tamo?

¹⁸ Taganán tinalagá ni Apo Namalyari ya kabooan lawini tamo ha mal-at ya pinilamo ta habaytoy kalabayan na.

¹⁹ Ay-êmên maboo ya lawini tamo no ayn mal-at ya pinilalamo?

²⁰ Ha kaptêgan, kal-atan ya pinilamo, ta êmên maboo ya lawini tamo.

²¹ Alimbawa ha lawini tamo, ay a na dapat habiên hén mata tamo ha gamêt tamo, ya a hila kailangan. A na etaman dapat habiên hén ulo tamo ha bitsih tamo, ya a na hila kailangan.

²² Ya êndat tamon alwan maalagá ha lawini tamo, ay habaytoy taganán kailangan.

²³ Ya an-ihipêñ tamo, ya alwan maalagá ha lawini tamo, ay habayto ya anhayhayêñ tamon mangêd. Haka ya an-ikarêng-êý ha lawini tamo, ay antagpêñan tamo.

²⁴ Noa, ya mangahampat ha lawini tamo, ay a tamon kailangan hén tagpêñan. Binoo ni Apo Namalyari ya lawini tamo, ta êmên madyanan pamandayêw ya kailangan dayêwêñ.

²⁵ Kabay dapat main pakikimiha ya kabooan

lawini tamo. Haka dapat miyahawop hilay pini-lalamo.

²⁶ No angkairapan ya miha, ay angkairapan ya balang miha. No andayêwên ya miha, ay dapat mag-in ikahigla hên balang miha ya habayto.

²⁷ Ya labay habiên hên habayto, ay hikitamo ya ampaniwala kan Apo Jesu-Cristo, ay nanad kabooan hên pinakalawini na, haka ya balang miha kantamo ay kalamo ha pinakalawini na.

²⁸ Kantamon ampaniwala kana, ay tinalagá ni Apo Namalyari hên dyanan kitamon tsi-tsihan galing ya ubat ha Espiritu na. Una, main kantamo ya dinyanan nan galing hên mag-in apostol na. Ikalwa, main kantamo ya dinyanan nan galing hên mag-in mámpamwang hên an-ipaihip na kanla. Ikatlo, ay main kantamo ya dinyanan nan galing hên mag-in móñoro hên habi na. Bayo main êt kantamo ya dinyanan nan galing hên manyag kapapaêpapah, haka kaatag ay dinyanan nan galing hên mamaalíh hên hakit. Main kantamo ya dinyanan nan galing hên manawop ha kapareho la. Main kantamo ya dinyanan nan galing hên mamaala, haka main kantamo ya dinyanan nan galing hên maghabi ha kaatag ya habi ya a la muwang.[‡]

²⁹ Hikitamo ya ampaniwala kan Apo Jesu-Cristo, ay alwan kaganawan apostol, alwan kaganawan hên mámpamwang hên an-ipaihip ni Apo Namalyari kantamo, alwan kaganawan hên móñoro hên habi na, alwan kaganawan hên main kapangyarihan hên manyag kapapaêpapah,

[‡] **12:28** Efeso 4:11.

³⁰ alwan kaganawan hēn main kapangyarihan hēn mamaalih hēn habit, alwan kaganawan hēn main galing hēn maghabi ha kaatag ya habi ya a tamo muwang, haka alwan kaganawan hēn main galing hēn ipamulah ya labay habiēn hēn anhabiēn la ha habi ya a la muwang.

³¹ Kabay pakikwanan tamoy maalagáy galing ya ikakangéđ tamo, haka ya ikakangéđ hēn kapareho tamo.

Amêhēn, toroan kataw hēn tungkol ha mangéđ pon, ha hinoman ya galing ya indin kantamo.

13

Ya pamanlugud

¹ Makapaghabi kitamo man hēn habi hēn kaatag, haka habi lan anghel, no ayn kitamon panlugud ha kapareho tamo, ay nanad kitamon tonoy ya bat hēn ampagtonoy hēn ayn labay habiēn.

² Malyarin main kitamon galing, ya ubat ha Espiritu ni Apo Namalyari, hēn nanad ha pamipamwang hēn an-ipaihip na kantamo. Malyari etaman hēn main kitamon pamangintindi ha kaganawan a pon impamwang. Malyari êt hēn main kitamon kaganawan kamwangan ya mamwangan lan tawo ya tungkol kan Apo Namalyari. Haka malyari ya main kitamon paniwala ya makhaw ya makapiálih hēn tawgtug. Noa, no ayn kitamon pamanlugud ha kapareho tamo, ay ayn pukat ya habayto.*

* ^{13:2} Mateo 17:20, 21.21; Marcos 11:23.

³ Idigalo tamo man ya kaganawan pibandian tamo ha mangairap, haka paulayan tamo man hēn ulamēn[†] ya lawini tamo, no ayn kitamon pamanlugud ha kapareho tamo, ay a tamo mapakinabangnan ya dinyag tamo.

⁴ No mapanlugud kitamo, ay mapagtēh kitamo, haka maingaloēn kitamo. Alwa kitamo maridya, mapaglalang, o mapagmatag-ay.

⁵ No mapanlugud kitamo, ay alwa kitamon mapampusmus, maimot, mahuhulukēn, o mapagtanēm hēn hakit nakēm.

⁶ No mapanlugud kitamo, ay a tamo an-ikahigla ya karawakan. Noa, an-ikahigla tamoy kaptēgan.

⁷ No mapanlugud kitamo, ay matēēhan tamo ya hinon angkalyari, haka a maalih ya tsiwala tamo ha kapareho tamo, a etaman maalih ya pamangēnggan tamon kangēran, haka matagalán tamo ya hinoman.

⁸ Ya galing ya an-idigalo nan Espiritu ni Apo Namalyari, ya nanad ha pamipamwang hēn an-ipaihip ni Apo Namalyari kantamo, ay main angga. Émbayro êt ya galing hēn mag-habi ha kaatag ya habi, ya a tamo muwang, ay main anggaan. Haka ya pamipamwang hēn tungkol kana, ay main angga etaman. Noa, ya pamanlugud ay ayn angga,

⁹ ta ya kamwangan, ya tungkol kana, haka ya pamipamwang hēn an-ipaihip na kantamo, ay kulang pon.

¹⁰ Noa, ha pamanlumatēng nan ganap ay maalih ya main pamagkulang.

† 13:3 o êmēn main kitamon maipaglambung.

11 Alimbawa, hêñ anak kitamo pon, ya ihip, pamangintindi, haka ya habi tamo ay nanad kanlan anak. Noa, gawan toa kitamina, ay inalih tamina ya nanad ha pandaygên lan anak.

12 Embayro êt kantamon ampaniwala kan Apo Jesu-Cristo. Ya kamwangan tamo, ya tungkol kan Apo Namalyari amêhêñ, ay kulang pon, nanad ha pamanlêk ha solamin ya naburareg. Noa, lano, lumatêng ya allo, ay mahêlêk tamina hi Apo Namalyari, hêñ arap-arapan, hêñ ayn kulang, ta makilala tamo ya, hêñ nanad ha pagkakilala na kantamo.

13 Kabay hata tatlo ay ayn angga. Una, ya paniwala tamo kana, ikalwa ya pamangênggan tamo ha pamag-orong na hêñ mantan kantamo ha ampaidyanan na ha langit, haka ikatlo, ya pamilulugud tamo. Noa, ya pinakamangêd kanlan habaytoy tatlo ay yabay ya pamilulugud.

14

Ya kaatag pon ya tungkol ha an-idigalo nan Espiritu ni Apo Namalyari

1 Mangêd ya pakikwanan tamon mag-in malugud. Pakaêngganan tamo êt ya an-idigalo nan Espiritu ni Apo Namalyari, lalon-laloy na, ya galing hêñ mamipamwang hêñ an-ipaihip na kantamo.

2 No ampaghabi kitamo ha kaatag ya habi, ya a tamo muwang, ay hi Apo Namalyarin bêngat ya kahabi tamo, gawan ayn kaatag ya makamulah ha anhabîen tamo ha kapangyarihan hêñ Espiritu na.

3 Noa, no mamipamwang kitamo hêñ an-ipaihip ni Apo Namalyari kantamo, ay mag-in nananiêh

ya paniwala lan ampanggilam, maaralan hila, haka mahawpan hila hêñ magtêñ ha kairapan.

4 No ampaghabi kitamo ha habi, ya a tamo muwang, ay sarili tamon paniwalan bêngat ya ampataniêñ tamo. Noa, no mamipamwang kitamo hêñ an-ipaihip ni Apo Namalyari kantamo, ay mapataniêñ ya paniwala lan patêl ha Panginoon ya angkapi-tsi-tsipon.

5 Labay ko dayin makapaghabi kitamon kaganawan ha habi, ya a tamo muwang. Noa, mangêñ pon ya mamipamwang kitamo hêñ an-ipaihip ni Apo Namalyari kantamo. Gawan maalagá pon ya habayto, kanan maghabi kitamo ha kaatag ya habi, ya a tamo muwang, maliban ha main mamipamulah hêñ anhabien tamo, ta êmén mapataniêñ ya paniwala lan patêl ha Panginoon ya angkapi-tsi-tsipon.

6 Hikaw ya patêl ko ha Panginoon, no alimbawa ta maniraw ko bahêñ, ta maghabi ha habi, ya a tamo muwang, ay a yon mapakinabangnan ya habayto. Noa, no mamitoro ko hêñ habi ni Apo Namalyari, o mamipamwang kamoyu hêñ an-ipaihip na kangko, ay mahawpan kaw.

7 Êmbayro êt ha bulongudyong o ha gitara man ya antsig-tsigêñ, ya alwan usto ya pangatono, ay hinoy mapakinabangnan tamo, no a tamo maintindihan ya habayto!

8 Haka nanad etaman ha tambuyok ya ampatonoyêñ, no umpisan labanan, no alwan usto ya tonoy, ay ayn makapaglêan hêñ makilaban!

9 Êmbayro etaman ya pamaghabi tamo ha habi ya a tamo muwang, ay ayn makamulah hêñ an-

habiên tamo, haka ayn bayton kapukatan ya habi tamo.

¹⁰ Mal-at ya habi bayri ha luta, haka ya balang miha ay main labay habiên.

¹¹ Noa, no a tamo angkaintindihan ya anhabiên hēn kahabi tamo, ay pareho kitamo hēn a mapikakaintindi nanad kitamon dayuhan, ya ubat ha marayo ya bansa.

¹² Gawan ha labay-labay yon digaloan kaw nan Espiritu ni Apo Namalyari, ya una ya dapat yon pakikwanan, ay mapataniêh ya paniwala hēn balang miha kamoyun patêl ha Panginoon, ya angkapi-tsi-tsipon.

¹³ Ha êmbayro, ay hikitamo ya ampaghabi ha kaatag ya habi, ya a tamo muwang, ay kailangan manalangin kitamo etaman, ya maipamwang tamo dayi ya anhabiên tamo.

¹⁴ Ta no ampanalangin kitamo ha habi ya a tamo muwang, ay ampanalangin ya espiritu tamo, noa, a mapakinabangnan hēn ihip tamo ya panalangin tamo.

¹⁵ Hino bayto ya dapat tamon daygēn? Ya daygēn tamo ay manalangin kitamo, haka magkanta kitamo ha espiritu tamo ha kaatag ya habi. Dapat kitamo êt hēn manalangin, haka magkanta ha mantēg habi tamo, hēn gamitēn ya ihip tamo.

¹⁶ Ha pagpahalamat tamon panalangin kan Apo Namalyari, ha kaatag ya habi, ayn makapaghabin, “Amen.” gawan a la angkaintindihan ya anhabiên hēn espiritu tamo.

¹⁷ Agyan ampagpahalamat kitamo ha kaatag ya habi, ay habayto ay a mapakinabangnan hēn

kapareho tamo, ha pataniêh hên paniwala la no a la angkaintindihan.

18 Ampahalamatan ko hi Apo Namalyari, ta am-pakapaghabî ko ha habi, ya a ko muwang, hên igit kamoyun kaganawan.

19 Noa, ha pami-tsi-tsipon tamon patêl ha Panginoon, ay mangêd pon, ya maghabi kitamon limay habi ya angkaintindihan, ya makab-in aral, kanan libo-liboy habi ya a angkaintindihan.

20 Patêl ko ha Panginoon, ha tungkol di, ay paan kaw mag-in kaihip hên anak. Malyari yon tuwarêñ ya anak, ya ayn muwang ha karawakan. Noa, ya pamangihip yon tungkol di, ay dapat mag-in nanad ihip lan manakêm.

21 Êmên ya di ya nakahulat ha Kahulatan ya impahulat ni Apo Namalyari, “Mamiutoh akon tawo ya ubat ha kaatag ya bansa, ya ampaghabî hên kaatag ya habi, ta êmên manggilam hilay Israelita. Noa, agyan iutoh ko hilay maghabi kanla ha kaatag ya habi, ay a hila manggilam.”*

22 Di ha kahulatan ay mamwangan tamo ya galing hên maghabi ha habi, ya a tamo muwang, ay indin ni Apo Namalyari êmên mamwangan lan a pon ampaniwala kana, ya kapangyarihan na. Noa, ya galing hên mamipamwang hên an-ipaihip na kantamo, ay para mapataniêh ya paniwala tamon ampaniwalay na.

23 Kabay ha pami-tsi-tsipon tamon patêl ha Panginoon, ay dapat main mamipamulah hên an-habiên tamo ha habi ya a tamo muwang. Ta kayno main maniraw, ya main kalamoy a pon

* **14:21** Isaias 28:11-12.

ampaniwala kan Apo Jesu-Cristo, haka no ayn mamipamulah, ta bat kitamon mipaghabi ha habi ya a tamo muwang, ay habiên la tana ya murit kitamo.

²⁴ Noa, no ha pami-tsi-tsipon tamo, ay an-ipamwang tamo ha mantêg habi tamo ya an-ipaihip ni Apo Namalyari kantamo, ay mamwangan lan habaytoy naniraw ya makasalanan hila.

²⁵ Mahawangan bayto ya kaihipan la, haka hila mandoko hên kikwan patawad ha nadyag lay kasalanan, haka la simbaên hi Apo Namalyari, ya wanla, “Pêtêg awud, hi Apo Namalyari ay atsi di hên kalamo yo.”

Dapat alwan magulo ya pami-tsi-tsipon lan ampaniwala kan Apo Jesu-Cristo

²⁶ Patêl ko ha Panginoon, labay kon habiên, ya no mi-tsi-tsipon kitamo hên magsimba kan Apo Namalyari, ay dapat ya kaganawan dyag tamo, ay matataniêh hên paniwala lan angkapi-tsi-tsipon. Main magkanta, main manoro, main mánipamwang hên habi ni Apo Namalyari, main maghabî ha habi, ya a tamo muwang, haka main etaman mamipamulah hên hinabi lan habayto.

²⁷ No main maghabî ha habi ya a na muwang, ay hukad ya lowa o tatlo ya mibanoh, haka kailangan main mamipamulah hên hinabi lan habayto.

²⁸ No ayn bayro ya mamipamulah hên hinabi la, ay paan hilan maghabî ha pami-tsi-tsipon lan patêl ha Panginoon, ta maghabî hila tana kan Apo Namalyari ha nakêm la.

²⁹ Tungkol etaman kanlan mánipamwang hên an-ipaihip ni Apo Namalyari kanla, ay lowa o tatlo

etaman ya mibanoh, ta dapat manimbângan lan kaatag ya nagilam la, no ubat kan Apo Namalyari, ya habayto o alwa.

³⁰ No main kaatag pon ya main labay hêñ ipamwang, ya ubat etaman kan Apo Namalyari, kaban ampaghabi ya miha, ay dapat tunggêñ pon ya hatoy ampaghabi, ta êmêñ ya makahabi ya miha.

³¹ Hikitamo ya angkapi-tsi-tsipon ay maubuh hêñ malyarin miha-mihan mamipamwang hêñ an-ipaihip ni Apo Namalyari kantamo, ta êmêñ maubuh kitamon matoroan, ta êmêñ mapataniêh ya paniwala tamo.

³² Hila man ya mámpamwang hêñ an-ipaihip ni Apo Namalyari kanla, ya dinyanan nan dapat habiêñ, ay kailangan mibabanoh hêñ mag-habi.

³³ Taganán a na labay ya main gulo ha pami-tsi-tsipon tamon patêl ha Panginoon.

Ya dapat ugaliêñ di, ay nanad ha andaygêñ ha balang pami-tsi-tsipon lan pinili ni Apo Namalyari hêñ mag-in kana.

³⁴ Kailangan patêkbêk hilay babayi. Bawal kanlan maghabi ha pami-tsi-tsipon, ta nakahulat ha Kautuhan naêñ hêñ Israelita, ya bawal kanlan babayi hêñ mamaala.

³⁵ No main hilan labay mamwangan, ay dapat kotangêñ lay ahawa la, no lumatêng hila ha bali la. Kaparêng-êy hêñ maghabi ya babayi ha lalêñ pagtsiponan ha oras hêñ pamagsimba.

³⁶ Yarin ubat kamoyu ya habi ni Apo Namalyari? O êndat yon hikaw bêngat ya ampakamwang hêñ tungkol kan Apo Namalyari?

37 Hinoman ya ampangihip, ya hila ay má mipamwang hén an-ipaihip ni Apo Namalyari kanla, haka hinoman ya ampangihip ya hila ay an-akayén hén Espiritu ni Apo Namalyari, ay dapat lan balayén ya habaytsi ya hulat ko kamoyu, ay pêtêg ya utoh ni Apo Namalyari.

38 Ya a ampamansin hén habaytsi, ay alwa yon pansiñen.

39 Kabay, patêl ha Panginoon, hangarén yo ya mag-in má mipamwang hén an-ipaihip ni Apo Namalyari kamoyu, noa, paan yo hilan bawalén ya ampaghabi ha kaatag ya habi, ya a tamo muwang.

40 Dapat hépat haka ayn gulo ya kaganawan dyag yo ha pamit-si-tsipon yo.

15

Ya panga-biyay oman ni Apo Jesu-Cristo

1 Hikaw ya patêl ko ha Panginoon, amêhén, ay an-ipaihip ko kamoyu ya Mangéd ya Habi ya impamwang ko kamoyu, ya ginilam yo, ya ampaniwal-an yoy na.

2 Habaytsi ya Mangéd ya Habi tungkol kan Apo Jesu-Cristo, ya impamwang ko kamoyu, ay makapiligtas kantamo ha parusa, no ihundo tamoy mantêg ya paniwala tamo.

3 Habaytsi ya intoro ko kamoyu, ya impamwang kangko, ay maalagá ha kaganawan intoro ko. Yabay ya, hi Apo Jesu-Cristo ay natsi ta êmén mapatawed ya kasalanán tamo. Nalyari ya habayto hén nanad ha nakahulat ha Kahulatan ya impahulat ni Apo Namalyari.*

* **15:3** Isaias 53:5-12.

4 In-ilbêng hi Apo Jesu-Cristo, haka ha ikatlon allo, ay biniyay yan oman hên nanad ha nakahulat etaman ha Kahulatan ya impahulat ni Apo Namalyari.[†]

5 Nagpahlék ya kan Pedro, bayo nagpahlék ya etaman kanlan kaatag ya tagahonol na, hên kalamo la hi Pedro.[‡]

6 Bayo nagpahlék ya etaman ha maigit pon ha liman gatoh ya patêl ha Panginoon ya naka-tsipon. Mal-at kanla, ay angkabiyay pon. Noa, ya kaatag kanla ay nunay na ha ikalwan biyay.

7 Nagpahlék ya êt kan Santiago, bayo nagpahlék yay na êt oman kanlan apostol na, hên naka-tsipon hilangan.

8 Hiko etaman, ay pinagpahlékan nay na êt ha katatawlian, hên a ko an-ihipén.[§]

9 Anhabién koy habaytsi ta ha kaganawan apostol, ay hikoy pinaka-maaypa, haka a ko dayin baégén apostol gawan pinairapan ko hilay ampaniwala kan Apo Jesu-Cristo.*

10 Êmbayro man, gawan ha ayn kapantag ya ingalo ni Apo Namalyari, ay hikoy nag-in apostol. A nahayang ya ingalo na kangko. Ta gawan habaytoy ingalo na, ay nagpagal ako hên igit pon kanlan kaatag ya apostol, ha pamipamwang hên tungkol kan Apo Jesu-Cristo gawan ha ingalo na kangko, alwan gawan ha sarili kon hêkaw.

11 Ubat kanla man o ubat kangko, ay pareho kay hên ampampamwang hên tungkol kan Apo Jesu-

[†] **15:4** Awit 16:8-10; Mateo 12:40; Dyag 2:24-32. [‡] **15:5** Mateo 28:16-17; Marcos 16:14; Lucas 24:34,36; Juan 20:19. [§] **15:8** Dyag 9:3-6. * **15:9** Dyag 8:3.

Cristo ya pinaniwal-an yo.

Ya tungkol ha pangoman pangabiyay lan natsi

¹² Amêhên, gawan ha an-ipamwang ya hi Cristoy biniyay oman, ay dapat ayn kantamon maghabin a biyayêñ oman ya hilay natsi.

¹³ Ta no a hila biyayêñ oman, ay labay habiêñ, a biniyay oman hi Apo Jesu-Cristo.

¹⁴ Ta no a ya biniyay oman hi Apo Jesu-Cristo, ay ayn kay hêñ ipamwang kamoyu, haka ayn kaw hêñ paniwal-an.

¹⁵ No a ya biniyay oman hi Apo Jesu-Cristo, ay ampaglaram kay hêñ tungkol kan Apo Namalyari, ta hinabi naêñ ya biniyay nan oman hi Apo Jesu-Cristo. Noa, no pêtêg ya a biyayêñ oman ya hilay natsi, ay a na bayto biniyay oman hi Apo Jesu-Cristo.

¹⁶ Ta no a biyayêñ ya hilay natsi, ay a ya biniyay oman hi Apo Jesu-Cristo.

¹⁷ Haka no a ya biniyay oman hi Apo Jesu-Cristo, ay alwan pêtêg ya paniwala tamo, haka a kitamo bayto pinatawad ha kasalanan tamo.

¹⁸ No a ya biniyay oman hi Apo Jesu-Cristo, ay labay habiêñ a pinatawad ya kasalanan lan natsi ya naniwala kana, ta nipalako hila ha impiyerno.

¹⁹ No ya pamangênggan tamo kan Apo Jesu-Cristo, ay para din bat ha biyay tamo ha luta, ay taganán ayn kapaingalo no alwan hikitamo.

²⁰ Noa, ha kaptêgan, ay biniyay oman hi Apo Jesu-Cristo. Kabay muwang tamo ya biyayêñ oman ya hilay natsi.

²¹ No ay-êmêñ nagkamain hêñ kamatsan gawan kan Adan, ya unan tawo, ay êmbayro êt ya

pangabiyay oman, ay gawan kan Apo Jesu-Cristo, ya nag-in tawo.

22 Kaganawan tamo ay matsi gawan kan Adan. Embayro êt, gawan ha pakikimiha tamo kan Apo Jesu-Cristo, ay mabiyay kitamon oman.

23 Noa, tsi-tsihan biyayêñ oman. Nuna hi Apo Jesu-Cristo. Haka ha pag-orong na di, ay biyayêñ nay nagpalokop kana,

24 bayo lumatêng baytoy anggaan, hêñ idin nay na kan Apo Namalyari ya Tatang tamo, ya tungkul-an nan mamaala panga-ubat nan hambutêñ ya kaganawan kapatsi na, ya hilay ampamaala, haka hilay main kapangyarihan.

25 Ta taganán, kailangan hêñ mamaala hi Apo Jesu-Cristo angga ha mahambut ya balang kapatsi na.[†]

26 Ya tawlin kapatsi, ya hambutêñ na, ay kamatsan,

27 ta êmêñ ya di ya nakahulat ha Kahulatan[‡] ni Apo Namalyari, “Impahuko kana ni Apo Namalyari ya kaganawan ya dinyag.” Muwang tamo ya a na impahuko ni Apo Namalyari ya sarili na kan Apo Jesu-Cristo, gawan impahuko nan bat kan Apo Jesu-Cristo ya kaganawan ya dinyag na.

28 Noa, no naubuh hêñ impahuko ya balang hino kan Apo Jesu-Cristo, ya Anak ni Apo Namalyari, ay hi Apo Jesu-Cristo man, ay pahuko ha kapangyarihan ni Apo Namalyari ya namahuko hêñ balang hino kan Apo Jesu-Cristo, ta êmêñ hi Apo Namalyari ya taganán mamaala ha balang hino.

[†] **15:25** Awit 110:1. [‡] **15:27** Awit 8:6.

29 Orongêñ tamon ihipêñ ya main taganán pangabiyay oman. Hila man ya ampabawtismo hén oman para kanlan natsi ya a pon binawtismoan, ay ampamaptêg, hén ampaniwala hila ha pangabiyay oman.

30 Yarin bat kay panay hén paipasubo ha kairapan, no a hila biyayêñ oman ya hilay natsi!

31 Allo-allo, pérad ako ta dayin natsi. Anhabiên koy habayto ta hikaw ya patêl ko ha Panginoon, ya an-ipagmahlay ko, hén gawan ha pakikimiha tamo kan Apo Jesu-Cristo, ya Panginoon tamo.

32 Main taganán pangabiyay oman. Kabay di ha balayan Efeso, ay matêéh koy kapalimoy pamakihubak, ya nanad ha pamanlumaban ha ayop ya makamatsi. No ayn pangabiyay oman, ay a kina dayin lumaban ta honolén ko tanay hata kahabian, ya wana, “Magpakapda kitaminan manggan, haka minêm ta ayn kitamon maêngganan ya ubat kan Apo Namalyari.”§

33 Paan yon lokoêñ ya sarili yo ta pêtêg ya habaytsi ya humonol ya kahabian ya wana, “No makilamo kitamo kanlan mapanyag karawakan, ay manwad kitamo kanla.”

34 Magpakanino kaw, haka talibatokan yoy karawakan. Ya kaatag kamoyu, ay alwan pêtêg ya pamakakilala kan Apo Namalyari, haka habaytoy dapat yon ikarêng-êy.

Ya mag-in lawini tamo ha pangabiyay hén oman

35 Main mangotáng ya wanla, “Ay-êmên nan biyayêñ oman ni Apo Namalyari ya hilay natsi? Ay-êmên ya lawini tamo bayto?”

§ **15:32** Isaias 22:13.

³⁶ Paan kitamon mag-in ayn minúwang. Nanad êt bêngat hên but-o hên tanaman ya kailangan hên itanêm ha luta bayo ya mabiyay oman.

³⁷ Ya an-itanêm tamo ay but-o. Noa, no tumubo yay na ay alwa yay nan but-o, ta mag-in tanaman yay na.

³⁸ Noa, atsi kan Apo Namalyari no hinoy mag-in lawini hên hino-hinon but-o.

³⁹ Alwan pare-parehoy laman hên dinyag na. Mihay laman tamo. Mihay laman hên kênan lanêm. Miha ya laman hên manok lalê haka ya kaatag pon ya ayop.

⁴⁰ Main dinyag ya panluta haka main etaman dinyag ya panlangit. Mihay kahampatan hên dinyag ya panluta, haka kaatag ya kahampatan hên dinyag ya panlangit.

⁴¹ Mihay kahampatan hên hêdag allo, haka kaatag ya kahampatan hên hêdag hên buwan. Miha pon êt ya kahampatan hên hêdag hên bêtêwê. Haka hilay bêtêwê ay tsî-tsihan kahampatan hên hêdag.

⁴² Embayro etaman ya lawini tamo amêhê, ay alwan pareho ha lawini lan biyayê oman ni Apo Namalyari, ta ya bangkay ya an-iilbêng ay anggumata. Noa, ya lawini ya biyayê oman ay ahina hêngumata.

⁴³ Ya bangkay ya an-iilbêng ay alwan mangahampat haka ayn hilan alagá. Noa, ya lawini ya biyayê oman, ay mag-in mahampat haka mak'haw.

⁴⁴ Ya in-iilbêng ay lawini ya panluta. Noa, ya lawini ya biyayê oman, ay mag-in lawini ya panlangit. Gawan main lawini ya panluta, ay main

etaman lawini ya panlangit.

⁴⁵ Ta nakahulat ha Kahulatan ni Apo Namalyari, ya wanana hulat, “Ya unan tawo ya dinyag, ay hi Adan, ya biniyay ni Apo Namalyari hên dinyanan hên kaêlwa.” Noa, hi Apo Jesu-Cristo, ya Taga-Langit, ya In-anak Tawo, ay dinyanan hên Espiritu ni Apo Namalyari hên lawini ya panlangit. Hi Apo Jesu-Cristo ya mam-in biyay ya panlangit.*

⁴⁶ Munay lawini ya panluta, bayo lanoy na ya lawini ya panlangit.

⁴⁷ Hi Adan, ya unan tawo, ay ubat ha luta, ta luta ya ginamit ni Apo Namalyari ha pamanyag kana. Noa, hi Apo Jesu-Cristo, ya maialimbawa ha ikalwan Adan, ay taga-langit.

⁴⁸ Hikitamoy kaapo-apoan ni Adan, ay panluta ya lawini tamo. Noa, hilay makapikilako lano ha langit, ay mag-in panlangit, hên nanad kan Apo Jesu-Cristo ya taga-langit.

⁴⁹ No ay-êmén kitamoy nanad kan Adan amêhên, ay êmén bayro etaman ay mag-in kitamo hên nanad kan Apo Jesu-Cristo lano.

⁵⁰ Hikaw ya patêl ko ha Panginoon, hata lawini tamo, ya main laman haka daya ay alwan panlangit. Ta hata lawini ya main anggaan, ay a makapakiatag ha biyay ya ayn anggaan.

⁵¹ Pakagilamén yo ya habaytsi ya kapapaêpapah ya impamwang ni Apo Namalyari: Pag-orong ni Apo Jesu-Cristo, ay main yan malatêng ya angkabiyyay di ha luta. Hila, haka hilay nunan natsi, ay bayoén na ngan.

⁵² Namakonkaynaman, ha mihay karêrêpan

* **15:45** Genesis 2:7.

mata, ha tonoy hēn tambuyok, ay omanēn biyayēn ya hilay natsi, ta hilay dyanan hēn lawini ya ahina matsi hēn angga-angga.[†]

⁵³ Ta tinalagá ni Apo Namalyari ya hata lawini tamo, ya main kamatsan haka anggumata, ay hagilyan hēn lawini ya ayn kamatsan ya ahina gumata.

⁵⁴ Kabay, no nahagilyan ya main kamatsan, hēn ayn kamatsan, ay matupad ya nakahulat ha Kahlutan ni Apo Namalyari, ya wanana hulat, “Nahambut ya kamatsan kabay taganán ayn nanan kamatsan!”[‡]

⁵⁵ “Taganán ayn nanan panambut ya kamatsan! Taganán ayn nanan kapangyarihan ya kamatsan hēn mamatsi!”[§]

⁵⁶ Makamatsi ya pamanyag hēn kasalanan, haka no nahambut kitamon kasalanan, ay nalyari ya habayto, gawan ha pamanyag tamo hēn bawal ha Kautuhan ni Apo Namalyari.

⁵⁷ Noa, magpahalamat kitamo kan Apo Namalyari, ya ampam-i kantamo hēn panambut ha kasalanan gawan kan Panginoon tamon Jesucristo.

⁵⁸ Kabay, anlugurēn kon patēl ha Panginoon, pakatalanēn yoy paniwala yo kana, hēn paan paamuyot ha kaatag ya toro. Panay kaw magpakahipēg ha pamaghuyo yo kana, ta muwang yoy na, ya pamagpagal yo kana, ay a mahayang.

16

Ya tungkol ha pamanipon, hēn idigalo kanlan

[†] **15:52** 1 Tesalonica 4:15-17. [‡] **15:54** Isaias 25:8. [§] **15:55** Oseas 13:14 (LXX).

mangairap ya ampaniwala kan Apo Jesu-Cristo

¹ Amêhên, patêl ko ha Panginoon, ipalinaw ko kamoyu ya tungkol ha pamanipon yon ihawop yo kanlan pinili ni Apo Namalyari hên mag-in kana, ya atsi ha Jerusalem ha probinsyan Judea, ay kailangan yon daygén hên nanad ha hinabi ko kanlan patêl ha Panginoon ya angkapi-tsi-tsipon ha Galacia.*

² Balang unan allo ha parominggo, ay dapat mangil-an ya balang miha kamoyu hên hatoy agyu na. Bayo, tsiponêñ yoy habayto, ta êmén ahina kailangan hên manipon, no atsi kina bahêñ.

³ Ha paglatêng ko bahêñ, ay ipagtan ko kanlan napili yo, ya natsipon yoy ihawop yo kanlan atsi bayro ha Jerusalem. Ihulat ko êt ya ipahlêk la bayro, ya main hilan karapatan hên mantan hên hawop yo.

⁴ No alimbawa ta kailangan hên hikoy mantan hên habayto ha Jerusalem, ay pakilako ko hila.

Ya pamaglêan ni apostol Pablo hên lumagay

⁵ Maniraw ko bahêñ kamoyu ha balayan Corinto panga-ubat ko ha probinsyan Macedonia, ta tinalagá kon bayro kon magdann.†

⁶ Labay kon magbuyot bahêñ, kayno angga ha makalabah ya panaon hên kêbêl, ta êmén ko pa-hawop kamoyu ha humonol ya pamanlumagay ko ha ayri man ya lakwén ko.

⁷ A ko labay hên magdann bêngat bahêñ, ta labay kon magbuyot bahêñ, no kalabayan hên Panginoon.

* **16:1** Roma 15:25, 26. † **16:5** Dyag 19:21.

⁸ Maglaêh ko bayri ha Efeso angga ha Pistan Pentecostes.[‡]

⁹ Bayri ko pon, gawan mal-at ya mabay hên manggilam hên toro ko. Main etaman mal-at ya anhumalanghang kangko.[§]

¹⁰ Ha pamanlumatêng na bahêni Timoteo, ay pakilamoan yo yan mangêd, ta êmêni ya a manyagah, ta hiyay kapareho kon ampaghuyo ha Panginoon.*

¹¹ Paan yo yan musmusêni, noa, galangêni yo ya, haka dapat hawpan yo ya, ta êmêni mahigla ya pagorong na di, ta an-êngganan naêni yan kapareho kon tagahuyo ni Apo Jesu-Cristo.

¹² Amêhêni, patêl ko ha Panginoon, ya tungkol etaman kan Apolos, ay pinakikwanan kon impapakahabi kana ya maniraw ya bahêni, hên kalamolan patêl, noa, a na labay amêhêni, ta lano tana kano no maarap na.

Tawlin habi

¹³ Pakaillag kaw. Magpakanîêh kaw ha paniwala yo kan Apo Jesu-Cristo. Pataniêhêni yoy ihip yo haka pakhawêni yoy nakêm yo.

¹⁴ Dapat main pamanlugud ya hinoman ya andaygêni yo.

¹⁵ Patêl ko ha Panginoon, muwang yo hilay atsi ha bali[†] ni Estefanas, ya nunan naniwala kan Apo Jesu-Cristo bahêni ha Acaya, ya probinsya yo, ay ampaghuyoy na kan Apo Namalyari ha panawop kanlan kapareho tamon pinili na hên mag-in kana. Ampakihabi ko kamoyu ya

[‡] **16:8** Levitico 23:15-21; Deuteronomio 16:9-11. [§] **16:9** Dyag

19:8-10. * **16:10** 1 Corinto 4:17. † **16:15** 1 Corinto 1:16.

16 palokop kaw kanlan nanad kanla, haka kanlan kapareho lan ampagpagal ha pamaghuyo kan Apo Namalyari.

17 An-ikahigla ko ya pamanlumatêng bayri, lan Estefanas, Fortunato, haka Acaico, gawan andaygên lay a yo madyag, gawan a kitamo napi-lalamo.

18 Hilay namahigla kangko, hên nanad ha pamahigla la kamoyu. Dambiên yo hilan mangêd ya hilay tawo ya nanad kanla.

19 Angkumustaên la kaw hên patêl ha Panginoon ya angkapi-tsi-tsipon di ha probinsyan Asia. Angkumustaên la kaw hên boon nakêm hi Aquila, hi Priscila, haka hilay patêl ha Panginoon, ya angkapi-tsi-tsipon ha bali la.[‡]

20 Angkumustaên kaw êt hên patêl ha Panginoon bayri.

Mikukumusta kaw, ta êmên ipahlêk ya pamanlugud yo ha miha ta miha hên nanad patêl ha Panginoon.

21 Hiko hi Pablo ya ampanulat hên habaytsi.

22 Parusaan dayi ni Apo Namalyari hilay ayn pamanlugud ha Panginoon.

Marana tha! O Panginoon naên, dayi tampol kan lumatêng.

23 Ingawan na kaw dayi ni Panginoon Jesus.

24 Anlugurên kataw ya kaganawan gawan ha pakikimiha tamo kan Apo Jesu-Cristo.

[‡] **16:19** Dyag 18:2.

**Ya habi ni apo namalyari: Bayon tsipan - Ayta
Mag-antsi
New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

lxviii

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

d2289d90-e8af-5f04-a1e1-312fd0921aff